

ՀԵՂԻՆԷ

Վ. Է. Պ

Տ-ին Մ. ՄԱՐԻՍԵԱՆԻ

(Շարունակութիւն 1)

IV

Հարսանիքից մի քանի օր անցած, առաւօտեան ժամի 11-ին նորապսակները նստած թէյ էին խմում ու լեզուակռիւ անում իրար հետ:

— Զէ', ներողութիւն կանես, Միշէլ, բաւական է ինչ երես տւիր ինձ, այսուհետեւ ես պէտք է քեզ համար թէյ ածեմ:

— Հա', հասկանում եմ, քաղաքավարի կերպով յիշեցնում ես, որ դու իրաւունքներ ունես, պատասխանեց Ամիրանովը շարունակ պաշպելով կնոջը:

— Լաւ, ասենք թէ հէնց այդպէս է, յետո՛յ, խօսքդ ի՞նչ է, բարձրաձայն ծիծաղով ասաց Հեղինէն ու կուռը մեկնեց, որ խլի մարդու ձեռիցը թէյամանը,

— Զէ, հոգիս, այսօր էլ դեռ դու հիւրս ես, իսկ վաղւանից արքունիքիս բոլոր գանձերն ու իշխանութիւնը կը յանձնեմ գեղեցկուհուս: Բայց զորա փոխարէն բռնակալ ամուսինը կը պահանջի, որ ինքը լիակատար իշխան լինի գեղեցկուհու սրտի վերայ, կատակի էր գցում Ամիրանովը, շոյելով կնոջ մազերը:

1) Տե՛ս «Մուրճ»-ի № 6:

Նորապսակների քաղցր զրոյցը ընդհատեցին հիւրերը:

— Տեսէք, տեսէք, ասաց նոցանից մէկը, մեր նորապսակները արդէն կուտան են իրար հետ:

— Հապա ի՞նչ էիր կարծում, Թամար, ի՞նչ է՝ մարդու գնացողի առաջ միայն վարդեր են փուլած, ծիծաղելով ասաց Ամիրանովը քրոջը, որ մօտ երեսուն տարեկան տգեղ օրիորդ էր:

Այդ ասելով նա պինդ սեղմեց կնոջ ձեռքը և կպցրեց իւր շրթունքներին:

— Ինչ ե՛ս եմ տեսնում, մինչև ձեր փշերին հասնելը դեռ շատ կայ, ասաց միւս, մօտ քառասուն տարեկան, այրի քոյրը և տարօրինակ կերպով ծիծաղեց: Բայց կատակը դէնը կենայ, Հեղինէ, ես ձեզ մի նկատողութիւն ունիմ անելու:

— Ի՞նչ:

— Դուք ձեզ շատ անզգայ էք պահում, այդպէս չի լինի:

— Ճիշդ է ասում, սիրելիս, ընդհատեց այրու խօսքը մօրաքոյրը, երէկ այն անձրևովը չը պիտի տանից դուրս գայիք:

— Բան չը կայ, ես սովոր եմ, առաջին անգամը չէ:

— Բայց այժմ ձեր դրութիւնը ուրիշ է. մեզանում ընդունւած չէ, որ նորահարսը պսակից յետոյ առաջին օրերը տանից դուրս գայ, վրայ բերեցին մօրաքոյրն ու այրին միասին, աշխատելով խել խօսքը մէկ մէկի բերանից:

— Ինչո՞ւ որ, զարմացած հարցրեց Հեղինէն: Միթէ՞, Միքայէլ, պսակած կնոջ բառարանումն էլ շուտ-շուտ է պատահում այդ անտանելի զննողական չէ՛ւր:

Խնամիների սրտին հարսի խօսքերը դիպան. նոքա միմեանց նայեցին հարցական հայեացքով:

— Մեր պարտականութիւնն էր ձեզ զգուշացնել, հիմա դուք զիտէք, հոգիս, կուգէք լսէք մեր խորհրդին, չէք ուզի հօ՛, քէֆը ձերն է, ինչ սրտներդ տայ այն կանէք:

— Լաւն էլ հէնց այդ է, հիմա էլ ով է ուշ դարձնում զանազան ասէկօսէների, մէջ ընկաւ Թամարը:

— Ամեն բան քո դատողութեամբն ես արել, նորա համար ես տանը մնացել, պառաւել, է՛, չարաչա՞ծ խէթ-խէթ նայեց քրոջ վրայ այրին:

Տեսնելով որ բանը վատ է վերջանալու, Ամիրանօվը խօսակցութիւնը ընդհատեց ու առաջարկեց հիւրերին գնալ քաղաքից դուրս զբօսնելու: Նոքա սկզբում չէին համաձայնում, բայց մարդ ու կին այնպէս թախանձում էին, որ չէր կարելի խաթրները կոտրել:

Զբօսնելուց տուն վերադառնալով Ամիրանօվները իրանց սեղանի վերալ երկու հիանալի փունջ տեսան. Կատարինէ Սահառունին էր ուղարկել:

—Միքայէլ, ե՛րբ ենք գնում ընկերուհուս մօտ. արի հէնց այսօր գնանք, ասաց Հեղինէն մարդուն:

—Ձէ, սիրելիս, գեռ շուտ է... ես շատ ազգականներ ու ծանօթներ ունեմ, ոչ մէկի մօտ չենք գնացել:

—Ի հարկէ չի կարելի, մէջ ընկաւ այրի քոյրը: Ամէնից առաջ Սահառունիների մօտ գնալով, բոլորին ձեռքդ կը գրգռէք:

Հեղինէն մի քիչ յօնքերը կիտեց:

—Գիտէք, քեռի, Ուրարօվը եկել է, կմկմալով ասեց թամարը գնալու ժամանակ:

—Վառ չի լինի, Միքայէլ, եթէ այցելութեան գնաս մօտը և ծանօթացնես նրան կնոջդ հետ, աւելացրեց միւս քոյրը:

—Այսինքն հաշուե՞մ հետը: Ձէ, ես երբէք չեմ մոռանայ այն անպատուութիւնը որ նա ինձ հասցրեց: Բացի այդ, աչքի առաջ ունենալով Մոսկւայում նորա վարած անառակ կեանքը, ես կարծում եմ, որ Հեղինէին չի վայելի հիւր ընդունել նորան:

Ամիրանօվը այնպիսի ձևով ասեց այդ, որ դժւար էր նրան աւարկութիւն անել, այնպէս որ քոյրերը սուս ու փուս կապեցին գլխաշորերը և դնացին:

Մի րոպէ չանցած պանգը խփեցին և իսկոյն ներս վազեց Կատեան զուքւած զարդարւած:

—Անունը տուր սուփրէն քցի, մենք հէնց նոր քո մասին էինք խօսում, հոգիս, ուրախ ուրախ դիմաւորեց նրան Հեղինէն և բռնելով երկու ձեռիցը նստացրեց բազմաթանկ վերայ:

—Երևի ուզում էիք իմ մօտ գալ, իսկ ես ձեզնից առաջ ընկայ: Բայց հա, մոռացել էի, որ Միխայիլ Պետրովիչը ձեռապաշտ մարդ է և չի կարող պաշտօնական այցելութիւններ չանել:

—Ի հարկէ, ծիծաղելով հաստատեց նորա խօսքը: Ամիրանօվը և հանեց նորա վրայից վերարկուն:



— Ձի կարող չանել, Կատեա, յարգելի պատճառներ կան:

— Ով է կասկածում որ: Ա՛յ, այս էլ իմ հոգևորը:

— Հեղիկ, դու ծանօթ ես չէ՞ Գէօրգի Ալեքսանդրովիչի հետ:

— Ի հարկէ, Միքայէլ, ասեց Հեղինէն ուրախ ուրախ զիմաւորելով հիւրին:

— Որտեղարենք էիր մինչև այժմ, բարեկամ, չե՞ս ամառում, արածդ ընկերավարի է՞ր:

— Ների՛ր, Միքայէլ, հարսանիքիդ հետևեալ օրն եմ եկել քաղաք:

— Իսկ Կատարինէի նամա՞կը:

— Նամակը չեմ ստացել, տիկին Հեղինէ, ես այնպիսի տեղերում էի թափառում, ուր փոստային հաղորդակցութեան ճանապարհներ չը կան:

— Հը, գործերդ ինչպէ՞ս են գնում. այն գործի համար, որ ուզում էիր սկսել, ընկերներ գտա՞ր, բարեկամաբար հարցրեց Ամիրանովը:

— Դեռ չէ, բայց յոյսս չեմ կորել:

— Բաւական է գործի մասին խօսէք, պարոններ, հրամայաբար ասեց Կատարինէն: Աւելի լաւ է անցեալը չիշենք, անցեալից խօսենք, — կարգադրում էր նա, նստելով և առաջարկելով բոլորին տեղաւորել սեղանի շուրջը, կասէիր իւր տանը լինէր:

— Տիկին Կատարինէ, կրա՛կէք, կրա՛կ:

— Ուրեմն զգոյշ կացէք, որ չայրւէք, Միխայիլ Պետրովիչ: Այդ ասելով Կատարինէն վեր թռաւ տեղիցը և էլ մի տեղում դադար չէր առնում, վազվզում էր, այս կողմ այն կողմ:

— Ասէք, ինդերեմ, տիկին Հեղինէ, կինս միշտ այսպէս չարաճճին է եղել, ծիծաղելով հարցրեց նորան Սահառունին:

— Հա, այդ կողմից նա շատ հաստատամիտ է, ամենևին չի փոխուել: Բայց գիտէք, Գէօրգի Ալեքսանդրովիչ, Կատեան ինստիտուտում ամէնքի սիրելին էր:

— Ուրախութեանս չափ չը կայ, Հեղինէ, որ դու ազատւեցիր վերջապէս քեռուդ կնոջից, արագախօսելով կտրեց նորա խօսքը ընկերուհին. մենք այժմ կարող ենք շուտ-շուտ տեսնուել:

— Ասէք ինդերեմ, Գէօրգի Ալեքսանդրովիչ, ինչո՞ւ դուք չէիք գալիս քեռուս մօտ, չը նայելով որ Կատեան այնքան խնդրում էր:

Այդ հարցնելիս Հեղինէն այնչափ անկեղծ ու մտերմութեամբ էր նայում Սահառունուն, որ նա չը կարողացաւ անկեղծ չը պատասխանել նորան։

—Անկեղծ ասած, տիկին Հեղինէ, ես ոչ մի բանից այնքան չեմ վախենում, որքան մի որ և է հասարակութեան, ընկերութեան մէջ աւելորդ մարդ լինելուց։ Ինձ թւում է, որ ես միշտ աւելորդ կը լինեմ այն ազնւակիրթ շրջանում, ուր ձեւապաշտութիւնից ամենաթեթեւ շեղումները յանցանք են համարում։

—Ճիշդ է, ոչ մի կարգին հասարակութիւն չի կարող տանել քո տաք վիճաբանութիւններն ու կծու հակաճառութիւնները, կատակով պատասխանեց Ամիրանովը։

—Ես էլ եմ շատ սիրում վիճաբանել. կը նշանակի մեր բնաւորութիւնները իրար կը բռնեն, ժպտալով ասաց Հեղինէն առանց լսելու մարդու վերջին խօսքերը։

—Խօսքով ընկանք. տուն գնալու ժամանակ է, ասաց Կատարինէն վեր կենալով տեղից։ Վաղը ժամի իննին շոր կարողը կը գայ մօտս։ Ինչո՞ւ չես վեր կենում, Գէորգ, չէ՞ դու ասում էիր, որ վաղ-ւայ համար շտապ թուղթ ունիս գրելու։

—Կացէք, ո՞ւր էք գնում, ընթրիք կ'անենք, կը խօսենք դէսից գէնից, չը թողեց գնան Ամիրանովը և զանգահարեց։

Սեղանը գցեցին։

—Խմենք, Գէորգ, մեր և մեր սիրուն ընկերուհիների բարեկամութեան յարատեւութեան համար։ Սկի մտքներովս կանցնէ՞ր, որ մենք երկու մտերիմ ընկերուհու վրայ ենք պսակելու։

—Բախտի բերմունքով այժմեանից մեր բարեկամութեան յարատեւութիւնը ապահոված է, աւելացրեց Հեղինէն ծիծաղելով։

—Կանայք, որքան յիշում եմ, հին ժամանակներից սիրոյ ու բարեկամութեան պաշտպաններ և խռովածներին հաշտեցնողներ են յիշում, ասաց Սահառունին։

—Լսում ես, Կատեա, որքան յոյսեր են դնում մեր վերայ մեր մարդիկը։

—Թէ քաջ են թող խռովեն. չէ՛, ես նոցա հաշտեցնողը չեմ. լաւ լսէք, պարոններ։

Դեռ երկար շարունակում էր նոցա խօսակցութիւնը անցեալի յիշողութիւնների մասին: Աէս գիշերից անց էր, որ նոքա բաժանւեցին իրարից:

V

Մեղրամիսները վերջանալու վերայ էին. նորապսակների համար սովորաբար սարքող քէֆերից ու խնջոյքներից յետոյ, Ամիրանօվները արգէն սկսել էին խաղաղ ու անվրդով կեանք վարել իրանց պարզ ու մաքուր բնակարանում: Ամբողջ տունը տալն ու վերայ անելուց ու կահ-կարասիքը իւր ճաշակովը տեղաւորելուց յետոյ, Հեղինէն սկսեց մեծ խնամքով կարգի բերել ու զարդարել իւր հիւրասենեակը որ շատ սիրուն սարքեց:

—Ա', Հեղիկ, ես շուտով բարձր պաշտօն կը ստանամ, ռոճիկս կ'աւելցնեն, այն ժամանակ աւելի կը կարողանաս զարդարել սենեակը, ասաց Ամիրանօվը տեսնելով կնոջը հիւրասենեակը սարքելիս:

Մի ամիս անցած Ամիրանօվը նոր պաշտօն ստացաւ և բոլորովին անձնատուր եղաւ իւր պաշտօնական գործերին:

Բաւական է որքան ժամանակ կորցրեցի կնոջս վերայ, պէտք է սկսել գործով պարապել, մտածում էր նա ինքն իրան:

Միայն ռոճիկովս բան չի դուրս գայ, նիստ ու կացս փոխել չեմ կարող. փող որ ունենայի, գիտեմ ինչ կանէի, անցնում էր յաճախ Ամիրանօվի մտքովը:

Երէկ սիրտս ուղում էր ճաքել, երբ որ տեսայ, թէ իշխանուհի Շակունին ինչպէս յօնքերը կիտեց մեր սանդուխքներով բարձրանալիս: Պատիժ է, մարդ չի կարողանում կարգին մարդկանց հետ գնալ-գալ ունենալ: Լաւ չի՞ լինի կնոջս փոքրիկ դրամագլխին ձեռք տամ. այդ թէ ինձ և թէ կնոջս համար օգտակար կը լինի:

Երբ որ Ամիրանօվը յայտնեց իւր միտքը Հեղինէին, նա ասաց:

—Ինչ ուղում ես, արա, Միքայէլ, ունեցած չ'ունեցածս քոնն է:

—Հոգի՛ս, սիրտս չի տանում, կսկծում է, երբ որ տեսնում եմ քո այժմեան խեղճ նիստ ու կացը այն ապրուստից յետոյ, որ...

—Լռի՛ր, Միքայէլ, ընդհատեց նորա խօսքը կինը և ձեռքը դրեց բերնին: Նս այժմ էլ շատ լաւ եմ ապրում:

—Յոյս ունեմ, որ յետոյ կը կարողանամ փողերը լրացնել, շարունակում էր մարդը առանց լսելու կնոջ խօսքերը:

—Սո՛ւս, սո՛ւս, ամօթ է, այդպիսի բաներ մի ասա. դու՝ երեւում է՝ ինձ դեռ լաւ չես ճանաչում:

—Բայց այն լաւ գիտեմ, հրեշտակս, որ եթէ քեզ շատ չը սիրէի, այդ բանը չէի անի: Մարդը պի՛նգ գրկեց կնոջը և մի քանի րոպէից յետոյ տանից դուրս եկաւ:

Այդ խօսակցութիւնից յետոյ Ամիրանօվը իւր տան կահաւորութիւնը օր օրի վերայ աւելի ու աւելի շքեղացնում էր: Հեղինէի համար այդ բաւական չէր, նորա սիրտն ուզում էր, որ մարդը իրան աւելի ժամանակ նւիրի, երեկոները հետը մնայ տանը, բայց նա միշտ զանազան ճշմարտանման պատրւակներով անկատար է: Թողնում կնոջ սրտի փափագը: Խեղճը անհամբերութեամբ սպասում էր տօներին, կարծելով թէ՛ այն ժամանակը մարդը ոչինչ գործ չ'ունենալով ամբողջ օրը իւր հետ կը լինի:

Հեղինէն մէկ-մէկ խնդրում էր մարդուն, որ իւր համար բարձր ձայնով կարգայ մի որ և է գիրք, որ ինքը լաւ չէր կարողանում հասկանալ: Սկզբում նա չկամութեամբ էր կատարում կնոջ խնդիրքը, իսկ յետոյ սկսեց քաղցրութեամբ համոզել նորան, որ իւր սիրուն գլուխը այդպիսի չոր ու ցամաք, վերացական բաներով չը լցնի, այլ այնպիսի գրքեր կարդայ, որով իրանց շրջանին պատկանող մարդիկ առհասարակ հետաքրքրւում են, կամ թէ երաժշտութեամբ պարապի, որի հմուտութիւնը, նորա ասելովը, կնոջ ամենասիրուն զարդերից մէկն է:

Կինը՝ ի հարկէ՝ հակառակ էր մարդու յայտնած մտքերին և մնացել էր շւարած, թէ ինչպէս նա այդքան շուտ սկսել էր դաւաճանել իւր գաղափարներին:

Մանօթներից ու խնամիներից Հեղինէին ամենից յաճախ այցելում էին տալերը—Ամիրանօվի քույրերը. մեծ տալը միշտ խառնւում էր նրանց ընտանեկան գործերին:

Ոչինչ հաճութիւն չը ստանալով իւր տալերի ընկերութիւնից, Հեղինէն մէկ-մէկ խնդրում էր մարդուն, որ երեկոները զնան իւր այս կամ այն ընկերուհու մօտ: Մարդը սկզբում աշխատում էր համոզել նորան, որ ձեռք քաշի այդ անօգուտ ծանօթութիւններից, բայց տեսնելով որ չի կարողանում համոզել, զանազան ճշմարտանման պատրւակներով հրաժարւում էր կնոջ հետ նրանց մօտ զնալուց:

Մի անգամ խօսք ընկաւ անկեղծ բարեկամութեան ու մտերմութեան մասին: Հեղինէն ապացուցանում էր այն ընկերութիւնների օգտակարութիւնը, որոնք հիմնւած են անկեղծութեան ու մտերմութեան վերայ:

— Գլխիցդ հանի, Ստողածդ սիրես, այդ ցանցառ մտքերը, անհամբերութեամբ ընդհատեց նորա խօսքը Ամիրանովը: Գիտեմ, այդ այն երկու սանտիմենտալ ընկերութիւններիցդ լսած կը լինես, որոնք հասարակութեան մէջ եղած ժամանակ երկու խօսք չեն կարողանում իրար հետ կապել ու անդադար կարմրում են:

— Ինչ թւում է, որ մարդու աղքատութիւնն ու համեստութիւնը ծաղրի առարկայ չեն կարող լինել,— տաքացաւ Հեղինէն:

Նա շուռ եկաւ և ուզում էր գնալ, բայց մարդը կանգնացրեց:

— Լսիր, հոգիս, ասածս ճիշտ չես հասկացել: Իմ ուղածս այն է, որ դու մտերմանաս այնպիսի մարդկանց հետ, որոնք կարող են նպաստել զարգացմանդ, որոնք կարող են քեզ մարդամէջ մտնող, ասող-խօսող ու մարդավարի վարուող կին դարձնել: Լաւ է, որ հենց մէկը մի քիչ սրտովդ չի լինում, մի խօսք էլ է հետը չես խօսում:

Ամիրանովը երկար ու բարակ բացատրում էր իւր միտքը: Նա ուզում էր պարզ և անկեղծ Հեղինէին ճարպիկ և վայելչակիրթ կին դարձնել:

Այսպիսի դէպքեր աննշան փոփոխութիւններով բաւական յաճախ էին կրկնւում ամուսինների մէջ և Հեղինէն ակամայ չիշում էր, որ իւր մարդը մի քանի ամիս առաջ, նշանած ժամանակը, բոլորովին ուրիշ տեսակ մարդ էր երևում:

Մի օր իրիկնապահին Ամիրանովենց մօտ հիւր եկան Վատարինէն ու իւր մարդը: Հեղինէն դեռ նստած տեղիցը չէր վերկացել նոցա դիմաւորելու համար, որ ընկերուհին, ձեռներն իրար խփելով, աղաղակեց:

— Լա՛ւ էք անցկացնում մեղրամիսներդ:

— Ինչո՞վ է վատ որ, պատասխանեց Հեղինէն աշխատելով ժրպտալ. և ակամայ մտքովն անցաւ, թէ որքան քիչ ժամանակ է նւիրում մարդը իրան,— առաւօտը վաղ գնում է ծառայութեան մինչև ճաշ, ճաշից յետոյ էլ իսկոյն պարկում է քնելու ու սպասի, որ քնից պէտք է վերկենայ. վերջապէս վեր է կենում ու իսկոյն գնում է

իւր իշխանաւորի՝ գեներալ Միհրանովի կնոջ մօտ նրա համար զանազան յանձնարարութիւններ կատարելու կամ թէ մի քիչ նստում է ու յետոյ գնում էլի նրա մօտ պրէֆէրանս խաղալու։ Եթէ ազատ ընկերներ մնում է՝ իրան երեխայի նման փաղաքշում, գուրգուրում է, դէսից դէնից մի քանի խօսք է խօսում հետը, ասելով թէ շատ ցաւում է, որ նրան չի կարող աւելի ժամանակ նւիրել, հետը երկար նստել, ժամանակ անցկացնել։

Հեղինէն հաւատում էր նորա ասածին, բայց չէր կարողանում սովորել մենակութեան։

— Ի՞նչ ես ընկել մտքիդ հետ, Հեղիկ, հարցրեց Կատեան ուրախ ձայնով ու մօտեցաւ պատուհանին։ Տեսէք, ի՞նչ լուսնեակ գիշեր է. դուրս եկէ՛ք, ման եկէ՛ք, չէ՛ք ուզում ման գալ, միասին մի բան կարդացէք, թէ չէ ի՞նչ էք ամեն մէկդ մի անկիւն մտել ու փիլիսոփայի նման մտածում, կարծես աշխարհիս հոգսերը ձեզ են տւել։

— Ա՛յ այդպէս, այդպէս, մի քիչ նախատեցէք Հեղինէին, թէ չէ շուտով գլխիս վկայոյտ գուլպա¹⁾ կը դառնայ, վրայ բերեց Ամիրանովը։

— Այդ ի՞նչ է ձեռիդ, Գէորգ։

— Տիկին Հեղինէին խոստացածս գրքերն է։

Հեղինէն շնորհակալութիւն յայտնեց Սահառունուն ու սկսեց հետաքրքրութեամբ թերթել գրքերը։

— Լա՛ւ, լա՛ւ, յետոյ կը նայես, արի, քեզ բան ունեմ ասելու, ասեց Կատարինէն ու զօրով քաշ տւեց նորան պատշգամբ։

Նրանք որ դուրս եկան սենեակից՝ Ամիրանովը խէթ-խէթ նայեց Սահառունուն վերայ։

— Աստուած սիրես, Գէորգ, կամ Հեղինէին այդ տեսակ գրքեր մի բեր կամ թէ ինքդ արի հետը կարդաւ։ Ես որ վաղուց է էլ այդպիսի փիլիսոփայութիւններով չեմ պարապում և՛ բացի դորանից՝ ժամանակ չունեմ, գործերով խեղաւած եմ, մինչև անգամ չեմ իմանում թէ աշխարհիս երեսին ինչ է կատարւում ինչ չէ կատարւում։

¹⁾ «Վկայոյտ գուլպա» Եւրոպայում տնւանում են ուսումնական ձեացող կանանց։

Գործերս իբր թէ քիչ էին, Նլիզաւետա Բօգդանօվնան էլ բարեգործական մասնաժողովների քարոտւղարութիւնը դրեց վզիս:

— Դու էլ բան չունես, այդ անզգամի ձեռն ես տւել սանձդ. հօ՛ գիտես, որ երեսին ամօթի նշոյլ չը կայ, զայրացած սկսեց խօսել Սահառունին:

— Ես այդպիսի կարծիք չունեմ նորա մասին...

— Ինչպէս թէ. միթէ՞ քո կարծիքով անամօթութիւնն է, որ որ մի հայ կին բան ու գործ է դարձրել աջ ու ձախ զրպարտել, հայհոյել հայերին, մինչդեռ նա՝ ընդհակառակը՝ պէտք է իւր պարտականութիւնը համարէր որքան կարելի է փարատել իւր շրջանի հասարակութեան մէջ մեր դէմ տիրող կանխակալ կարծիքները: Մենք բոլորս աշխատում ենք որ բոլորն էլ կասկածով վերաբերւին նորան, իսկ դու...

— Նատ բան կարողացանք անել, չէ՞: Հօ էլի կանանց մանկավարժական մասնաժողովի ամենագործունեայ անդամը նա է:

— Որովհետեւ գիտի, որ այդ միջոցով ամենից հեշտ է արիւտօկրատների շրջանը նորա համակրութիւնը վայելել:

— Իսկ այն թէ ով է եղել քարոտւղարը, ե՛ս թէ Մարկոսը, Կիրակոսը, Ի՛նչ նշանակութիւն ունի, մէկ չէ՞: Բացի այդ՝ Նլիզաւետա Բօգդանօվնան այնքան էլ վատ կին չէ, որքան դու ես կարծում: Զուր ես, եղբայր, մեղնում զաղափարական ազնւութիւն փնտրում: Մեր հայերիս ճակատին գրած է, որ պէտք է չարչարանքով մեզ համար կեանքում ճանապարհ բանանք ու շատ անգամ՝ ակամայ՝ խորամանկութիւն գործ դնենք պատահած արգելքներին յաղթելու: Ես էլ գիտեմ, որ այդ շատ ցաւալի բան է, բայց ինչ արած, եղբայր, աշխարհքն այդպէս է, մի մարդ հօ չի կարող բոլորի դէմ գնալ:

— Հա, ի հարկէ, այդ սկզբունքով որ դատելու լինենք, ամեն բանի վերայ պէտք է թեթեւ նայենք: Որ այդպէս է էլ ինչո՞ւ ենք, ասա ինչդեմ, աշխատում ուսում տալ, կրթել ջահէլներին, դառն ծիծաղով պատասխանեց Սահառունին:

— Խօսքերդ շատ քաղցր են հնչում, Գէորգ, բայց շատ հետաքրքրական է, թէ արդեօք էլի այդ շարականները կերգէիր ու արհամարհանքով կը վերաբերէիր պետական ծառայութեան, եթէ:

բան է՝ զրկւելի՛ր կալածներիցդ ստացւող տարեկան երկու հազար բուլլու արդիւնքից։

Սահառունին ընկերներից շատ էր լսել այդ տեսակ նկատողութիւններ, արհամարհանքով նայեց Ամիրանովին ու աւելի լաւ համարեց լռել։

—Այնպիսի սքանչելի երեկոյ է, պարոններ, որ մեղք է տանը նստելը, լսեց տիկիւնների ձայնը։

—Ուրեմն գնանք ման գալու, վճռեցին ամենքը և բոլորը միասին տանից դուրս եկան։

—Հեղիկ, գու Քէորզի թւն անցիր, իսկ ես քո մարդու, մի լաւ սիրաբաստիկ լինենք ով աւելի շնորհք ունի։

—Դուք, Եկատերինա Իւանովնա, մեռելին էլ տեղիցը կը շարժէք, կենդանութիւն կը տաք. վերայ բերեց Ամիրանովը։

—Դուք, կարծեմ, մարդուս հետ խօսում էիք Միհրանովայի մասին։ Մարդս ասում է, որ նա շատ խելօք ու եռանդոտ կին է և ուզում է ինձ նորա հետ մօտ ծանօթացնել, ճոռապարհին դիմեց Հեղինէն Սահառունան։

—Հա՛, ծիշդ է, նա շատ եռանդոտ կին է ու յիմար էլ չէ, հեգնօրէն պատասխանեց Սահառունին, բայց վախենալով, թէ չը լինի Միհրանովան մարդ ու կնկայ մէջ կուսպատճառ դառնայ, խօսքը կտուրը գցեց։

Երկու երեք անհետաքրքրական նախադասութիւններից յետոյ Հեղինէն ասաց։

—Զարմանալի է, Քէորզի Ալեքսանդրովիչ, դուք երկար ժամանակ արտասահմանումն էք եղել ու ոչինչ չէք պատմում այնտեղի մասին։

Հեղինէին թւեց, թէ իւր վերջին խօսքերը անախորժ տպաւորութիւն գործեցին Սահառունու վերայ. նա տարակուսած շարունակեց։

—Կարելի է ձեր արտասահմանում անցրած ժամանակը անախորժ չիշողութիւնների հետ է կապւած. շատ ցաւում եմ, որ սկսեցի խօսել արտասահմանի մասին։

—Ո՛չ, ո՛չ, տիկին Հեղինէ, աշխուժով ընդհատեց նորա խօսքը Սահառունին։ Ո՛չ մի տեղ ես այնպէս բախտաւոր չեմ եղել, ինչպէս արտասահմանում։ Զը կարծէք թէ ես միշտ հիմիկւայ պէս մռայլ եմ

եղել: Ոչ, սիրտս այն ժամանակ լիքն էր ուրախ զգացմունքներով: Մենք ամենքս, տիկին Հեղինէ, օտարութեան մէջ աշխատելիս, մեծ յոյսեր ենք տածում վերջը մեր հայրենիքի համար օգտակար զաւակ լինելու: Մարդ յոյսով է ապրում, հոգին փառաւորւում է, սիրտը միշտ լիքն է լինում քաղցր զգացմունքով, որ չի կարելի խօսքով նկարագրել: Այո, մենք ամենքս էլ այդ ժամանակ, այդ բարոյապէս հարուստ ժամանակներս, զգում էինք, որ բարի և ազնիւ ենք: Այդ խօսքերից յետոյ Սահառունին մտախոհ գլուխը քաշ գցեց: Զը նայելով որ նա իրան զսպում էր, բայց էլի մի թեթեւ հոգոց դուրս թռաւ նորա կրծքից:

Հեղինէն այդ նկատեց ու մտերմաբար նայեց Սահառունուն:

— Յետոյ երևի հիասթափւեցիք. մեղաւորն ո՞վ է:

— Բացի ինձանից ես ոչ ոքի չեմ մեղադրում. շատ բան որ յետոյ կատարւեց, ես պէտք է առաջուց գուշակէի. դորա մասին, տիկին Հեղինէ, մենք մի օր կը խօսենք երբ որ յարմար ժամանակ լինի:

Երկար նոքա լուռ գնում էին, վերջապէս Հեղինէն նորից խօսք բաց արեց.

— Որքան նկատում եմ, Գէօրգի Ալեքսանդրովիչ, դուք ձեր վերաբերմամբ շատ խստապահանջ էք: Ես բառ առ բառ չիշում եմ այն խօսքերը, որ դուք մարդուս, երբ որ նա ձեզ խորհուրդ էր տալիս ծառայութեան մտնելու, — «ամեն մարդ պէտք է քննական կերպով վերաբերւի ինքն իրան, իւր իմացածին, իւր ոյժերին, հաստատ իմանայ թէ ինքն ինչ կարող է անել և յետոյ մի բանական նպատակ որոշելով դիմի նորան, աշխատի իրագործելու: Ձեր այդ խօսքերը այնպիսի խոր տպաւորութիւն գործեցին իմ վերայ, որ մինչև այժմ էլ չեմ կարողանում մոռանալ:

Սահառունին զարմանքով ու երախտագիտութեամբ նայեց Հեղինէին և մտածեց, «հա թէ ում սրտումն են արձագանք գոնում իմ խօսքերը»:

— Շատ շնորհակալ եմ, տիկին Հեղինէ, ձեր համակրութիւնը ինձ երկար ժամանակ սիրտ կը տայ գործելու, ասաց նա ժպտալով և մտերմաբար մեկնեց նորա ձեռքը:

— Աաղը եկէք մեզ մօտ ճաշելու, Գէօրգի Ալեքսանդրովիչ, կը թերթենք նոր գրքերը, խնդրեց Հեղինէն մնաս բարև անելիս, մա-

նաւանդ որ դուք վաղը մենակ էք մնալու, Կատեան ամբողջ օրով գնալու է իւր սանամօր մօտ:

— Մեծ ուրախութեամբ:

— Հազիր ձեր բնագիտութեան դասերն էլ կը սկսէք, իսկ ես ու Միխայիլ Պետրովիչն էլ ամիսը մի անգամ ձեզ կը քննենք, ուրախ ուրախ ասաց Կատարինէն:

— Իսկ երեկոյեան բոլորս միասին կ'երթանք նազահանդէս. բարեգործական մասնաժողովն է սարքում իւր ուսումնարանների օգտին, ես արդէն ձեզ համար տոմսակներ առել եմ. համաձայն էք, առաջարկեց Ամբրանով:

— Շատ լաւ, շատ լաւ, — միաձայն բացականչեցին Հեղինէն ու Կատարինէն:

VI

Սահառունին, քսան տարեկան հասակում աւարտելով ուսումը Մօսկւայի համալսարանի բնագիտական բաժնում կանդիտատի աստիճանով, գնաց արտասահման իւր մասնագիտութեան մէջ կատարելագործելու համար: Զորս տարի արտասահմանում մնալով, նա լուրջ և բազմակողմանի կերպով ուսումնասիրեց բնական գիտութիւնները. վերջին տարին նա գլխաւորապէս պարապում էր գործադրական քիմիայով:

Մանուկ հասակում հեռացած լինելով Կովկասից նա երազի նման էր յիշում իւր հայրենիքը, բայց նորա սրտում մնացել էր և տարեց տարի զօրանում էր ջերմ սէր դէպի իւր հայրենակիցները: Երբ որ Սահառունին վերադարձաւ իւր հայրենի ե. քաղաքը, Անդրկովկասի նահանգական քաղաքներից մէկը, նորա սիրտը լի էր ազնիւ ձգտումներով. նա ուզում էր օգտակար լինել իւր հայրենիքին, գործադրել իւր ձեռք բերած գիտութիւնը և քաղել իւր երկարամեայ աշխատանքների պտուղը: Առաջին ամիսը ամբողջ նա նւիրեց մօրը, քոյրերին ու եղբայրներին, որոնք մինչև նորա վերադարձը նորան տեսնելու յոյսով էին միայն ապրում: Ինքն էլ շատ էր կարօտել նրանց, մանաւանդ մօրը, որի բարի պատկերը խորը տպաւորւել էր երեխայի յիշողութեան մէջ: Հօրական տունը զարթեցրեց

երիտասարդի երեակայութեան մէջ մանկութեան տպաւորութիւնները. քիչեց նա թէ ինչպէս մայրը սովորեցնում էր իւր երեխաներին, ոչ թէ չոր ու ցամաք խրատներով, այլ իւր անձի օրինակով, կարեցեւ, օգնել աղքատներին, ինչպէս ահա այս սենեակում ընդունում էր չքաւորներին, իւր ձեռով կարում—կարկտում աղքատ երեխաների շորերը և տօն օրերին իրան տալիս նոր շորեր, որ տանի նոցա բնակարանները. որքան քաղցր զգացմունքով էր յուզւում նորա սիրտը այդ ժամանակ:

Յիշեց այդ բոլորը Սահառունին և սիրով նայեց իւր՝ թէև բոլորովին անուսումն, բայց բարեհոգի և խելացի մօրը:

Իսկ նա, այդքան տարւայ բացակայութիւնից յետոյ վերադարձած տեսնելով, ուրախութիւնից քիչ էր մնում գժւի. պարծենում էր իւր որդովը, ինչպէս բոլոր մայրերը, և տանում էր իւր աչքի լոյսին բոլոր աղգականների ու ծանօթների մօտ՝ ցոյց տալու համար:

Ն. քաղաքի արտաքին տեսքը շատ անախորժ տպաւորութիւն գործեց երիտասարդի վերայ,—ծուռ ու մուռ, ցեխոտ, անանցանելի փողոցներ, անշնորհք, անձողնի շինութիւններ, չորս կողմը կնդտ ու գարշահոռութիւն, առողջապահութիւն ասած բանի մասին լսած էլ չը կան: Մի ամիս չ'անցած նա համոզւեց, որ Ն.-ի ներքինն էլ լիովին համապատասխանում է արտաքինին: Հասարակութիւնը կազմում էին բնիկ հայերն ու թուրքերը և՛ մասամբ եկւոր՝ ծառայողների դասակարգը: Ինիկ ժողովուրդը, ստրկաբար հնազանդելով հին աղաթներին, բոլորովին նահապետական կեանք էր վարում: Պառաւ կանայք դեռ բերանները կապում էին, իսկ ջահէլները հազարից մի մի անգամ էր պատահում, որ տանից դուրս դալին, այն էլ օտար մարդու պատահելիս շտապով երեսները դարձնում էին պատին: Հրաւերներին, խնջոյքներին միշտ կանայք տղամարդիկներից առանձին էին նստում, ուտում. մի խօսքով բացի մի քանի ընտանիքներից, որոնք անվերջ բամբասանքների առարկայ էին դարձել, բոլոր հայ կանայք փակւած կեանք էին վարում:

Խուլ գաւառական անկիւններում մարդիկ միշտ պատահելով ու տեսնելով իրար, իմանալով միմեանց կենցաղավարութեան բոլոր մանրամասնութիւնները, միմեանցից զգւած են լինում, և այդ պատ-

ճառով ամեն մի նոր անձնաւորութիւն դարձնում է իւր վերայ գաւառացիների ուշադրութիւնը:

Սահառունին ամեն կողմից հրաւերներ էր ստանում, ամենքն էլ ցանկանում էին մի որ և է բանով փայլել նորա առաջ: Նա ամեն տեղ գնում էր, բայց աւելի դիտում ու լսում էր քան խօսում: Սահառունու համար դժւար չէր նկատել, որ Ե.-ի հասարակութեան կրթւած կուլած շրջանը զբաղւած է միայն պառաւական բամբասանքներով, անվերջանալի թղթախաղով՝ կոպէկանոցից սկսած մինչև աղարտ խաղերը՝ և աստիճանաւորների զատարկ կռիւներով:

Սահառունու Ե. գալու օրից կէս տարի էր անցել: Նա շատ էր ուղւում մի որ և է գործ գտնել, բայց դեռ ոչ մի գործ չէր գտնւում: Ասենք Սահառունին բոլորովին պարապ չէր մնում. նա այնքան ժամանակ հայրենիքից հեռու էր ապրել, որ այժմ դիտելու և ուսումնադիրելու շատ բան ունէր. բացի այդ՝ աշխատում էր ծանօթանալ ժողովրդի դրութեան հետ, իմանալ ինչով կարող է օգնել նորան, և գէպքը եկած տեղը օգնում էր ուրախութեամբ:

Սահառունին բարեկամացաւ քաղաքային պատգամաւորների հետ և աշխատում էր նրանց վերայ ազդել հասկացնելով իրանց հասարակական պարտականութիւնները քաղաքի վերաբերմամբ, բայց նա շուտով համոզւեց, որ նոքա իսկական մարդիկ չեն այլ մեքենաներ: Տեղային վարչութիւնը սկսեց նայել Սահառունու վերայ իբրև անվստահելի անձնաւորութեան վերայ, որ իբր թէ վայր է գցում իւր նշանակութիւնը ժողովրդի աչքում և քաղաքավարի կերպով այնպէս արեց, որ նա չը կարողանայ խառնել քաղաքային գործերին:

Այդ միջոցին Սահառունին ծանօթացաւ Աբգարեանների ընտանիքի հետ. — մի այրի մայր և մի աղջիկ էին: Տիկին Աբգարեանը ամուսնու մահից յետոյ իւր ձեռքն առնելով կալւածների, իրանց եկամուտների միակ աղբիւրի, կառավարութիւնը, ստիպւած էր միշտ Ե.-ում ապրել, թէև աղջիկը շատ էր խնդրում նորան, որ Թիֆլիս գնան ապրելու: Աբգարեանների ընտանիքը իւր գաղափարներով, իւր կրթութեամբ Սահառունուն՝ անապատում պատահած՝ օաղիս թւաց, իսկ տասնութ տարեկան սիրուն աղջիկը՝ մի շուշան այդ օաղիսում: Որիորդի նորափութիթ գեղեցկութիւնը մարդու իսկք էր տանում: Նորա շարժուն դէմքի ամեն մի գիծը անմեղութիւն ու աշխոյժ էր

արտայայտում: Սահառունուն որ թողնէին, ամեն երեկոյ հիւր կերթար Աբգարեանների մօտ, բայց մայրը չէր թողնում:

— Իմացի՛ր, Գէորգ, ասում էր նա համոզիչ եղանակով, եթէ ամեն օր գնաս գաս նոցա տունը ու յետոյ չը պսակես աղջկայ վերայ, անունդ կը կոտրւի քաղաքում և էլ քեզ ոչոք աղջիկ չի տայ:

Սահառունին աւելի ևս մօտ ծանօթացաւ և բարեկամացաւ տիկին Աբգարեանի հետ, երբ որ երկուսով սկսեցին աշխատել օրիորդաց դպրոց հիմնել Ե. քաղաքում:

— Շուտո՞վ կը բացւի մեր ուսումնարանը, հարցրեց մի օր տիկին Աբգարեանը երեկոյեան թէյի ժամանակ:

— Պէտք է յուսալ, որովհետեւ քաղաքացիներից շատերը համարեա թէ համոզւել են, որ օրիորդաց ուսումնարանը անհրաժեշտ բան է:

— Ես էլ, Գէորգի Ալէքսանդրովիչ, աշակերտուհիներին երաժշտութիւն ու երգեցողութիւն դաս կը տամ, ուրախ ուրախ առաջարկեց տիկին Աբգարեանի աղջիկը:

— Ափսոս, օրիորդ, որ այդ առ ժամանակ աւելորդ կը լինի մեր աշակերտուհիների համար, ծիծաղելով ասեց Սահառունին: Դուք հայերէն ու ռուսերէն կարդալ—գրել կը սովորեցնէք, համաձայն էք:

— Լա՛ւ:

— Ես համոզւած եմ, որ ձեզ պէս վարժուհու ձեռքի տակ մեր աշակերտուհիները շատ առաջ կերթան:

— Մի՞թէ, — կատարինէն չը կարողացաւ պահել ծիծաղը և փախաւ սենեակից:

— Մի շարաթ յետոյ քաղաքացիներից տասը—տասնհինգ հոգի, որոնք զարգացմամբ բարձր էին ամբոխից, Սահառունու երկար ու բարակ յորդորներից յետոյ վերջապէս յանձն առան որոշեալ գումար նւիրել օրիորդաց դպրոց հիմնելու համար:

Սահառունու ուրախութեանը շափ չը կար: Ժողովը վերջանալուց յետոյ նա ուրախ զւարթ դուրս եկաւ և ղնաց փոխ-նահանգապետ Միհրանովի տունը: Այնտեղ այդ երեկոյ խնջոյք էր ի պատիւ Թիֆլիսից եկած երկու բարձրաստիճան պաշտօնեաների:

— Ասէք խնդրեմ, Գէորգի Ալէքսանդրովիչ, դեռ ձեռք չէք

վերցրել օրիորդաց դպրոց հիմնելու մոքից, — հարցրեց նորան տանտիրիկներ, Նլիդաւետա Բօդդանօֆնան: Նա նստած էր նորեկ երկու հիւրերի մէջ տեղը և շողօքորթաբար նայում էր նրանց երեսին: Լաւ չի՞ լինի մի ուրիշ բանի համար գործ գնել փողերը՝ այնպիսի մի բանի համար, որ աւելի օգտակար լինի քաղաքին:

— Ի՛նչ բանի համար, ասէք խնդրեմ, բարկացած ընդհատեց նորա խօսքը Սահառունին:

— Բան չունե՞ս, Գէորգ, ասեց նորան Պետրոսեանցը, որ նորա հին ընկերներիցն էր, ինչ ես երկար ու բարակ խօսում: Այդ խօսքերը արտասանելիս Պետրոսեանի տգեգ, թուխ և սև մօրուքով պատած դէմքը լո՛ւրջ արտայայտութիւն էր կրում:

Պետրոսեանցը պատանեկական հասակից արդէն վառվում էր սիրով դէպի իւր ազգը, տանջւում էր նորա ցաւերով... Նա հաւարակ վաճառական տղայ էր և դժւարութեամբ էր կարողացել համաձայնեցնել հօրը, որ իրան թոյլ տայ բարձրագոյն ուսում ստանալու: Նա քսանչորս տարեկան էր երբ որ համալսարան մտաւ: Զբաւորութիւնը և ուսերէն վատ իմանալը սկզբում խանգարում էին նորա պարապմունքներին, բայց տոկուն աշխատասիրութեան, հաստատակամութեան և ընկերների նիւթական օգնութեան շնորհիւ նա յաղթեց բոլոր արգելքները և վերադարձաւ հայրենիք բնական գիտութիւնների կանդիդատի աստիճանով:

Երկար ժամանակ զուր աշխատելով իւր մասնագիտութեան համապատասխան մի պարապմունք գտնելու, նա ակամայ ծառայութեան մտաւ վարչական բաժնեւում: Թէև Պետրոսեանը զոհ էր իւր ստացած շնչին ուճիկից, բայց լո՛ւրջ էր իւր զրութիւնից, որովհետև վարչութեան մէջ ծառայելը նորա սրտովը չէր: Բախտը Պետրոսեանին երես չէր տւել. նորա ամբողջ կեանքը մի անընդհատ կռիւ էր եղել կեանքի անբարեյաջող պայմանների հետ: Այդ անընդհատ կռիւը Պետրոսեանին ղիւրազրգիւ և դաժան բնաւորութեան տէր մարդ էր դարձրել, այնպէս որ շատերին նա անհամակրելի էր թւում: Բայց Սահառունին Պետրոսեանին երեխայ ժամանակաւից էր ճանաչում և անկեղծ սիրում էր նորան նորա ազնիւ և ամեն մի լուր գործի անձնւիրաբար ծառայելու պատրաստ սրտի համար:

— Զէ, ճիշտ ես ասում, Տիգրան, խօսելով, վիճելով բան չի

դուրս գայ: Պէտք է աշխատել հանել մեր ժողովուրդը իւր այժմեան վիճակից, հնարաւորութիւն տալ նորան կրթւելու, զարգանալու. մեզ ուսումնարաններ են պէտք, ուսումնարաններ, իսկ այժմ մենք համարեա չ'ունինք ուսումնարաններ: Տէք ժողովրդին ուսումնարաններ:

—Ասելը հեշտ է, բանը՝ անելն է, դառնութեամբ արտասանեց Պետրոսեանը և ամբողջ մարմնով կուշ եկաւ:

Սահառունին մտածմունքի մէջ ընկաւ:

Որքան աւելի էր ծանօթանում նա Ե.-ի հասարակութեան հետ, այնքան աւելի էր զգում որ իւր և այլ հասարակութեան մէջ ոչինչ բարոյական կապ չը կայ, որ ընդհակառակը բոլորը սկսել են քաշւել իրանից. բաւական է մի բան ասի, մի բանի վրայ ուրախանայ կամ թէ մի կարծիք յայտնի, ամեն կողմից հազար ու մէկ դատողութիւն կը տան, կազաւաղեն ասածը, կը բամբասեն: Ճիշդ է, նա առաջ էլ գիտէր, որ իւր հայրենիքը թաղած է տգիտութեան խաւարի մէջ, բայց այդքան չէր կարծում: Ծանօթներն ու ազգականները հանգիստ չէին աալիս Սահառունուն, հարց ու փորձ էին անում թէ ինչ ծառայութեան է մտնելու. նա միշտ միւնոյնն էր պատասխանում,— թէ կը նայեմ, կը ծանօթանամ, կը տեսնեմ ինչ կայ, ինչ չը կայ, երևի մասնագիտութեանս համապատասխան մի գործ կը գտնեմ,— բայց ահա երկրորդ տարին է, ինչ Ե.-ումն է և դեռ ոչ մի հաստատ գործի չի կպել: Քաղաքացիք սկսել էին նորա վերայ ծիծաղել, «քիթը շատ է բարձրացրել, փիլիսոփայ է եկել մեր գլխին. այս արտասահմանի ուսումը խելքից գցում է մեր երիտասարդներին, որ այստեղ մնային ու գործով պարապէին, չէր լինի. պէտք է գնային պարապ քաշ գալ ու զաւակութիւն անել սովորէին»: Այլուխի խօսքեր շատ անգամ Սահառունու ականջին էլ էին հասնում, որովհետև բաւական ազատ, համարձակ էին խօսում, մանաւանդ մի դէպքից յետոյ.— Սահառունուն մի շատ շահաւէտ պաշտօն առաջարկեցին ի պատիւ նորա հօրեղբօր, որ քաղաքում մեծ ազգեցութիւն ունէր. Սահառունին հրաժարւեց. բոլորը մնացին ապշած և աւելի սկսեցին ծիծաղել նորա վերայ:

Սահառունին ուշ չէր դարձնի այլ ասէկօսէներին. բայց մօր թախանձանքն ու լացը հանգիստ չէին տալիս նորան: Մայրը և իւր

տեղը չէին կարողանում հասկանալ, թէ ինչ է ուզում Սահառունին, ինչու է հրաժարւում այգպիսի բախտից, որ հազարից մի անգամ է մարդու առաջը գալիս:

Սահառունին բոլորովին էլ պարապ չէր մնում. պաշտօնից դուրս էլ մարդ շատ գործ կարող է գտնել կատարելու: Երկու ամիս էր ինչ նա իրան նւիրել էր մի գործի, որ համապատասխանում էր իւր գաղափարներին: Մի օր գործով պարապելուց նա սաստիկ յոգնած ու տխուր տուն եկաւ ու տեսաւ որ մայրը աղջիկներին ու փեսաներին գլխին հաւաքած լաց ու շիւանը գրել է:

— Խնչ է պատահել, մայրիկ, հարցրեց նա սրտացաւ թեամբ:

— Ել ինչ պէտք է պատահի, ուր գնում եմ, քո վատն են խօսում. իշխանները, աղաները հօ կատաղած են քո դէմ. ինչ բան ունես նրանց հետ, որդիս, ինչու ես նրանց հակառակ գնում:

Մայրիկ ջան, դու գիտես, որ բէգերից մէկը ուզում է խեղճ գիւղացիներից խլել հօրական, պապական նրանց պատկանող հողերը. ուզում է հարիւրաւոր ընտանիքներ կտոր հացից զրկել: Նրանք էլ ինձ են դիմում, որ իրանց պաշտպանեմ: Խնչ անէի, ասէի գնացէք ինչ անում էք արէք, իմ բանս չի. թողնէի՞, որ հարիւրաւոր խեղճ մարդիկ դունն դուռ ընկնէին:

— Դիտեմ, որդիս, այդ վաղուցւայ վէճ է, քանի տարի է գիւղացիք պատարանների շէմքերը մաշում են. գործը այնպէս խճճւել է, որ դու չէ, ով էլ զայ չի կարող արձակի, արի, հոգիս, ինձ լսի, ու ձեռք քաշի այդ գործից. ես գիտեմ, գիւղացիներին օգուտ չես տալու, միայն այն է, որ նրանց կը թշնամացնես մեր բոլոր ազգականների հետ:

— Աղահով կղիր, մայրիկ, ոչ ոքի իմ պատճառով մնաս չի հասնի: Թողէք այս դործը վերջացնեմ, էլ այստեղ չեմ մնայ, կերթամ Թ. . .:

Այդ միջոցին ներս մտաւ հօրեղբայրը. բոլորը պատկառանքով վեր կացան տեղներից:

Սկսեց լաց ու կոծ, չորս կողմից աղաչում պաղատում էին, բայց Սահառունին իւր վճիռը փոխելու միտք չ'ուներ. մնալ Ե. -ում, ուր ոչ մի աւուղջ գաղափար համակրութիւն չէր կարողանում գտնել, նորա կարծիքով նշանակում էր ողջ-ողջ գերեզման մտնել, որ միայն

խելացնորը կարող է անել: Տեսնելով որ լաց ու կոծով բան չի դուրս գալիս, մայրն ու քույրերը դարձրեցին իրանց աղերսալից աչքերը հօրեղբոր վերայ, իբրև տան մեծի վերայ, որ Սահառունու հօր մահից յետոյ նորա ընտանիքի գլուխն ու պաշտպանն էր համարւում: Նա հպարտ-հպարտ մի խիստ ակնարկ գցեց շուրջը, և ծալապատիկ նստելով սկսեց մոռհոգ կերպով յետ ու առաջ գցել սաթէ համրիչի խոշոր հատիկները: Սենեակում տիրեց խորին լուռութիւն, բոլորը նպասում էին, թէ ինչ կ'ասի հօրեղբայրը և հանդիսաւոր րոպէի աղդեցութեան տակ իրար երեսի էին նայում հարցական հայեացքով: Վերջապէս հօրեղբայրը, համրիչը ձեռքին փաթաթելով և երեք անգամ հազալուց յետոյ, աչքերը բարձրացրեց դէպի Սահառունին ու սկսեց խրատական եղանակով.

— Որդի, քեզ լաւ յայտնի է, որ մենք ոչինչ չենք խնայել քեզ լաւ ուսում տալու համար. գու գիտես, թէ մայրդ ինչ դժւարութեամբ քեզ թողեց գնաս արտասահման, ու գնալուցդ յետոյ ինչպէս աչքը ջուր կտրած սպասում էր քեզ: Որքան տանջւել, որքան զրկանք է քաշել նա քեզ համար, իսկ դու, ապերախտ, ինչով ես վարձատրում այդ բոլորը: Ինչո՞ւ չես ուզում ծառայութեան մտնել, ի՞նչ գործ պէտք է գտնես որ զրանից պատւաւոր լինի. ախր ինչով է վատ ծառայութիւնը: Մի հարցնող լինի թէ այժմ գործիդ անունն ինչ է,—տուտուց-տուտուց բաներ ես բռնում, օր չի անցնի որ մի խալտարակութիւն դուրս չը գայ, հիմա էլ՝ այդ բաւական չէ՝ ուզում ես մօրդ թողնել ու գնալ. աֆֆերի՛մ, աֆֆերի՛մ:

— Գէորգ ջան, աչքիս լոյսը, խնլքի եկ, մեզ մենակ մի թո՛ղ, ընդհատեց հօրեղբոր խօսքը մայրը՝ աղաչելով:

Որդին քնքշութեամբ բռնեց մօր երկու ձեռքը:

— Մայրիկ, հանգստացիր, հօ՛ւ չեմ կարող պարապ մնալ, ինչ անեմ որ այստեղ ինձ յարմար գործ չեմ գտնում: Դու հօ չես ուզի, որ քո որդին փողոցները չափելով ման գայ: Մայրիկ ջան, ապահով կաց, ես ձեզ չեմ մոռանայ, շուտ-շուտ կը դամ տեսնելու:

— Տեսէք, տեսէք, ծիծաղեց հօրեղբայրը, այստեղ իրան յարմար գործ չը կ'այ: Այ լաւ տղայ. ինչի պէտք է մօրը, քույրերին բախտաւորացնել, նորանց համար փող աշխատել. հազիր ամբողջ տարին մեզ համար պարապ ման կը գանք ու քէֆ կը քաշենք:

Ասա, Աստուծո՛ւ սիրուն, մինչև հիմա մի դրօշ բերել ես տուն. է, դրօշն էլ քեզ լինի. ինչո՞ւ էիր դալիս ու մեր տան խաղաղութիւնը վրդովում. Սորա՞ համար էիր սովորում. արժէ՞ր այնքան փող փաշանել ուսմանդ վերայ, աւելի լաւ չէ՞ր լինի, որ ուրիշ բանի համար գործ դրած լինէինք այն փողերը:

Սահառունին յօնքերը կիտեց ու ուզում էր պառաւսխանել, բայց մայրը ձեռքով արեց, չը թողեց որ խօսի: Խեղճը աղերսալից հայեացքը ուղղած որդուն, աչքերով խնդրում էր որ լսի, և աշխատում էր փոխել անախորժ խօսակցութիւնը, բայց, չը նայելով նորա զգոյշ վարմունքին, հօրեղբայրը էլի նեղացաւ և վիրաւորաւձ ձայնով ասաց:

—Հա, ի հարկէ, հիմա այս տանը կամ ես կամ Կօշայ ժամահարը, խօսքիս ո՞վ է ականջ դնողը, ո՞ւմ են պէտք իմ խորհուրդներս: Ա՛յ հիմա ձեր տան գլուխը, մատնացոյց արեց նա Սահառունուն:

Հօրեղբայրը վեր կացաւ թախտի վրայից. բոլորը նորանից առաջ ոտքի էին կանգնել: Սահառունուն շատ չէր դուր գալիս այդ սովորութիւնը, բայց իմանալով որ այդ սովորութեան հակառակ վարելով բոլորին կը վիրաւորի, ինքն էլ վեր կացաւ տեղիցը: Հօրեղբորը այդ շատ դուր եկաւ և նորա դէմքի արտայայտութիւնը մի փոքր մեղմացաւ: Սահառունին լուռ կանգնած շրթունքները ծամում էր: Նա գիտէր, որ ընտանիքի կրտսեր անդամների ներկայութեամբ ծերունուն հակաճառելը տեղական սովորութեան համաձայն մեծ վիրաւորանք է համարւում: Բախտաւորապէս մի պատահական հանգամանք ազատեց նրան այդ դժւար դրութիւնից. եկան ասացին, որ Պետրոսեանը եկել է, կանչում է, գործ ունի հետը:

Ընկերոջ հետ մօտ մի ժամ խօսելուց յետոյ Սահառունին առաջորկեց նորան միասին դնալ Աբգարեանների մօտ:

—Կարծեմ, այսօր նրանց նշանակւած օրն է:

—Հա:

—Որ այդպէս է, կարող ես մենակ գնալ. այսօր ես գամ, ինչ անեմ:

—Ինչպէս թէ ինչ անես: Օրիորդ Աբգարեանի նման հիանալի աղջկայ հետ խօսելն էլ զւարճութիւն է. կասես, կը խօսես, երա-

ժշտութիւն կը լսես: Գիտեմ, գիտեմ, ինչու չես ուզում գնալ, Տիգրան, վախենում ես սիրահարւես:

— Ե՛հ, եղբայր, ինչ կը սազի ինձ սիրահարւել, գրպանումս մկներ են պար զալիս, ասաց Պետրոսեանը տարօրինակ կերպով ծիծաղելով և սկսեց պատմել իւր ծառայութեան ժամանակ պատահած անհամութիւնների մասին: Իմացած կաց, եղբայր, որ ինչ որ ուրիշները անպատիժ անում են, եթէ մենք անելու լինէինք արժանի չէր նստի մեզ:

— Է, ես աչդ վաղուց գիտեմ:

— Եթէ ուզում ես ծառայել, պէտք է ազատ, անկախ հայեացքներդ ծալես, գրպանդ դնես, այս է փորձաւոր մարդու խորհուրդը:

— Ապահով կաց, Տիգրան, ես ծառայութիւն մտնողը չեմ: Դու էլ վեր կաց միասին... Գնանք Թիֆլիս բախու փնտրելու:

— Ձէ, եղբայր, ես չեմ կարող հաստատ բանը թողնել անյայտի յետեից ընկնել. ամբողջ ընտանիք կայ վզիս:

Նոքա խօսելով մօտեցան Արզարեանների տանը. խօսք ընկաւ Կատարինէի մասին:

— Գիտե՛ս, Գէորգ, նորա աչքը քո վերայ է:

Սահառունին կարմրեց, բայց և միևնույն ժամանակը ուրախացաւ: Նա ինքը գրաւուած էր օրիորդովը. մի քանի ժամանականից սկսած օրիորդը նորա գլխիցը չէր դուրս գալիս:

Արզարեանների հիւրասենեակում հաւաքւած սակաւաթիւ հասարակութիւնը ուրախ ուրախ խօսում էր առաջիկայ ուխտագնացութեան մասին. շուտով լինելու էր Սուրբ Գէորգի ուխտը:

— Դուք էլ ի հարկէ կը գնաք, դիմեց Կատարինէն Սահառունուն ու մինչև ականջատակերը կարմրեց:

— Այնտեղ կը տեսնէք ե-ի ու շրջակայ բոլոր գիւղերի հասած աղջիկներին, մէջ ընկաւ Միհրանովան:

— Որոնց ծնողները տանում են ուխտատեղիները փեսացուներին ցոյց տալու համար, կարծես տօնվաճառ լինի, ընդհատեց զոքանի խօսքը աստիճանաւորը: Այնպէս չի, Ելիզաւետա Լօզդանօվնա, աչդ նպատակով են ուխտ պնում, չէ՞. կարծեմ, ձեզանից եմ լսել այդ:

— ձիշտ է, ձիշտ: Խա՛չը, մարդու զարմանքը դալիս է՝ տես-

ներով մեր ժողովուրդը. ո՛րքան վայրենի սովորութիւններ ունի, ասաց Միհրանովան և ինքնագոհ ժպիտով նայեց նահանգապետի կնոջը:

—Իսկ կապած բերանները տեսնելիս հօ՛ մարդու զգանք է գալիս, աւելացրեց Միհրանովայի աղջիկը դէմքը ծամաժուելով:

—Ժամանակով այդ էլ կը փոխւի. ժողովրդի մէջ շատ խոր արմատներ են գցում սովորութիւնները. անկարելի բան է, որ դարերով եղած սովորութիւնը մի օրում արմատախիլ լինի, բայց հետզհետէ անպատճառ կ'ոչնչանայ. ա՛յ, տեսնում էք, գուք հօ՛ չէք...

—Նա ձեզ մի անգամ ընդ միշտ խնդրել եմ, Գէորգի Ալեքսանդրովիչ, չարացած ընդհատեց խօսքը աիկինը, որ ինձ այստեղացիների շարքը չը դասէք, ինձ կրթել են կատարեալ...

—Ի հարկէ, ի հարկէ, վրայ բերեց Միհրանովան, իմ աղջիկը ամենալաւ պանսիօններին մէկումն է կրթւել, ա՛յ, այս տարի էլ երկուսը կ'աւարտեն ինստիտուտը:

—Ախ, հազար ներողութիւն, որ անգիտակցաբար ձեզ վիրաւորեցի. այսուհետեւ էլ չեմ մոռանայ, որ զուք եւրոպական ծագումից էք, կծուհեգնեց Սահառունին:

Միհրանովայի աղջիկը կարմրատակած դուրս եկաւ սենեակից:

Սահառունին ու Կատարինէն իրար նայեցին համակրութիւն արտայայտող հայեացքով:

—Նա վաղուց է բախտ չեմ ունեցել լսելու ձեր գեղեցիկ նւագածութիւնը:

Օրիորդը այնպէս նայեց Սահառունուն, կարծես, աչքերով ասելիս լինէր՝ «ձեր ցանկութիւնը ինձ համար սուրբ է», և մօտեցաւ դաշնամուրին:

Կատարինէն շատ ընդունակ էր երաժշտութեան և հիւսնալի ածում էր. Սահառունին միշտ մեծ հաճութեամբ էր լսում նորա ածելը:

Արդէն կէս գիշերից անց էր, երբ որ նա քնաք բարեւ ասեց Աբգարեաններին. տրամադրութիւնը շատ լաւ էր:

Ո՛րքան օրը Սահառունին ֆայէտօն նստացրեց Կատարինէին, նորա մօրը և իւր քրոջը, և ինքը ձի նստած հետները ծանապարհ ընկաւ դէպի սուրբ Գէորգ:

Ֆայետոնների, տարանտանների և՛ գոյնզգոյն գորգերով ու մետաքսեայ բարձերով, մոլթաքաներով զարդարած՝ սալլերի քարաւանը ձգւում էր ամբողջ ձանապարհի երկայնութեամբ մինչև ուխտատեղին, որ մի սարի գագաթին ծառերով շրջապատուած գեղեցիկ վանք էր: Կառքերի կողքին ճանաչին էին տալիս զուքւած ու զրահաւորւած իգիթները, նստած նոյգնների վերայ, որոնց արանքին զգոյշ շարժւում էին ոտաւորներն ու էշաւորները:

Ուխտատեղին հասնելով Սահառունին մի բարձր տեղ ընտրեց, որտեղից ամբողջ տեսարանը լաւ երևում էր: Կատարինէն ծառին կռթնած, ուրախ դէմքով նայում էր տօնախմբութեանը: Հիանալի տեսարան էր. ձիաւորները ձիարշաւ էին անում, մի տեղ պար բռնած երգում էին, մի քիչ հեռու դափ ու զուռնա էին ածում. ծափ ու ծիծաղը սար ու ձոր թնդացնում էին. աչքդ որ կողմը դարձնէիր ծաղկազարդ դալար կանաչի վերայ սպիտակ վրանների, վրանանման սարքած սալլերի ու ծառերի սոււերում քէֆ անող տղամարդկանց ու գոյնզգոյն շորեր հագած պարող աղջիկների ու նորահարսերի խմբեր կը տեսնէիր: Սահառունին հիացած նայում էր օրիորդի կարմրած դէմքին, որ ոչ մի ժամանակ նորան այնքան զրաւիչ չէր թւել, ինչպէս այդ րոպէին:

— Դուք այսօր շատ ուրախ էք, օրիորդ, չէ՞:

— Շա՛տ, շա՛տ, բացականչեց նա, և վազեց մօր մօտ ու սկսեց նորան համբուրել: Ի՞նչ լաւն ես այսօր, մայրիկ ջան:

Տեղը վերադառնալով Կատարինէն Սահառունու վերայ քնքոյշ հայեացք գցեց:

— Ես շատ եմ սիրում չորս կողմն լիութիւն աւ գոյութիւն տեսնել: Գիտէք, Գէօրգի Ալեքսանդրովիչ, ես որ թագուհի կամ մեծ հարստութեան տէր լինէի, ունեցածիս մեծ մասը ժողովրդական տօնախմբութիւնների վերայ գործ կը դնէի:

— Միթէ՞, ուրախ-ուրախ հարցրեց Սահառունին ու ծիծաղեց: Իսկ ես, օրիորդ, երկիւղածութեամբ կը խոնարհէի այդպիսի մեծահոգի թագուհու առաջ:

— Դուք ծիծաղում էք, բայց տեսէք թէ ինչ հիանալի բան է: Խեղճերը բոլոր ցաւերն ու հոգսերը տանը թողած, դարդերը մոռացած, ուզում են սրտանց ուրախանալ, քէֆ անել: Ինձ համար

այնքան էլ նշանակութիւն չ'ունի, ես առանց այն էլ միշտ լաւ տրամադրութեան մէջ եմ, բայց խեղճերը...

Կատարինէի աչքերը հանդիպեցին Սահառունու աչքերին և նա կարմրեց: Նայելով օրիորդին Սահառունին զգում էր, որ սիրտը լցւում է մի ինչ որ նոր, մինչև այդ ժամանակ նորան անծանօթ քաղցր զգացմունքով: Նա կարծես մոռացել էր կեանքի բոլոր դառնութիւնները. նորա ապագայ կեանքը այժմ աւելի հրապուրիչ գոյներով էր նկարւում նորա երևակայութեան մէջ:

— Մայրիկ, մայրիկ, աղաղակեց յանկարծ Կատարինէն հեռւից տեսնելով մօրը, Գէորգի Ալեքոանդրովիին են մի քիչ նախատիր, ծաղրում է ինձ:

— Ընդհակառակը, ինձ մեծ զարճութիւն պատճառեց ձեր ասածը, այդպիսի ցանկութիւնները միշտ անարատ ու ջերմ սրտից են բղխում: Իմ կարծիքը սխալ դուրս չ'եկաւ, դուք հիանալի աղջիկ էք: Սահառունին յափշտակութեամբ բռնեց Կատարինէի ձեռքը, բայց իսկոյն բաց թողեց: Երանի նորան, որ կարժանանայ ձեր սէրին: Օրիորդը աչքերը քաշ դցեց:

— Ինչի՞ վրայ էք այդպէս միտք անում, օրիորդ:

— Մտքովս անցնում է, թէ աւելի լաւ կը լինէր, եթէ դուք մեր քաղաքը եկած չը լինէիք, որովհետև ձեր գնալուց յետոյ սարսափելի տխուր կը լինի, արագախօսելով և բոլորովին անսպասելի կերպով արտասանեց Կատարինէն:

Վերջին խօսքերը նա հազիւ լսելի ձայնով ասաց ու սաստիկ կարմրելով սկսեց անթարթ նայել մօտ քառասուն քայլ հեռու վառուղ կրակին:

— Զեմ կարող ասել թէ որքան ուրախ եմ, օրիորդ, որ կարող եմ հաւատացած լինել, թէ իմ բացակայութիւնը ձեզ համար զգալի կը լինի, յուզւած սկսեց խօսել Սահառունին մի փոքր լռութիւնից յետոյ: Իմ սիրտս էլ դժւարութեամբ է հաշտւում այն մտքի հետ, որ մենք պէտք է բաժանուենք, եթէ...

Այդ րոպէին նրանց մօտեցաւ տիկին Արգարեանն ու Սահառունու քոյրը. նրանք վեր կացան և բոլորը միասին գնացին դէպի խարոյկը: Այդ կրակի վրայ նոցա համար բօղբաշ, փլաւ սև խորոված էին պատրաստում: Ամեն տեղ խարոյկներ էին վառւում, ամեն տե-

ղից երգի ձայն էր գալիս. Սահառունին հետաքրքրութեամբ ու ուրախ սրտով ման էր գալիս՝ մի խմբից միւսը անցնելով:

Ճաշի ժամանակ և երեկոյեան սուրճ վերադառնալիս ամբողջ ծանապարհի ընթացքում Կատարինէն լուռ էր ու մտահոգ և խուսափում էր Սահառունու հայեացքից: Սահառունին հասկանալով էր օրիորդի հոգեկան վիճակը: Նա վաղուց յափշտակած էր օրիորդի գեղեցիկ դէմքով, անմեղ և վառվռուն բնավորութեամբ. նորա սէրին արժանանալը նորան անհասանելի բախտաւորութիւն էր երեւում իւր Ե.-ում քաշած տարի ու կէսւայ աքսորի մէջ: Էլ երկար ու բարակ չը մտածեց Սահառունին. յարմար առիթ էր, առաջարկութիւն արեց օրիորդին:

Սահառունու մայրը իրան վիրաւորւած էր զգում: Որդին ու հարսը գլխովը փարւան էին գալիս, բայց էլի նա երկար ժամանակ չէր կարողանում մոռանալ, որ իւր անդրանիկը առանց իւր խորհրդի ու աջակցութեան է կին ընտրել:

— Տա՛ւ Ստուռած, այնքան ապրեմ, որ թոռներիս տեսնեմ, ուրախանամ, քիչ-քիչ մխիթարում էր նա ինքն իրան:

VII

Հարսանիքից մէկ-երկու ամիս յետոյ Սահառունին իւր կնոջ հետ գնաց Թ.-ս: Թ.-սում այդ ժամանակ երիտասարդութեան առաջաւոր մասը մեծ եռանդով նւիրել էր իրան ժողովրդի կրթութեան գործին: Ողևորւած երիտասարդները ծխական նոր-նոր դպրոցներ էին հիմնում և աշխաստում էին բարեփոխել թեմական դպրանոցի վիճակը: Ժողովրդի կրթութեան գործը շատ մօտ էր Սահառունու սրտին. նա հոգով սրտով անձնատուր եղաւ նորան:

Բայց պարապմունք գտնել անհրաժեշտ էր: Երկար ժամանակ յարմար գործ չը գտնելով, Սահառունին վճռեց մտնել ծառայութեան մի տեղացի դրամատէրի մօտ, որ ուրիշների հետ համեմատելով գտնէ այն առաւելութիւնն ունէր, որ գործունեայ էր: Պարապելով արդիւնաբերութեան դանազան ճիւղերով և յաճախ գործ ունենալով թէ կառավարութեան և մասնաւոր մարդկանց հետ, դրամատէրը այդ գործերը Սահառունուն էր յանձնում վարելու, որ այդպիսով միջնոր-

դի դեր էր կատարում: Սահառունուն դուր չէր գալիս պաշտօնի անորոշութիւնը. նա չէր ընդունի այդ պաշտօնը, բայց զրամատերը խոստացաւ նորան յանձնել շատ ձեռնտու պայմաններով իւր շուտով հիմնելիք գործարանի կառավարութիւնը: Թէև այդ գործունէութիւնը Սահառունու մասնագիտութիւնից դուրս էր, բայց նորա գործնական կողմը նորան բաւական ծանօթ էր և զորա համար նա հեշտ կարող էր ուսումնասիրել և տեսական կողմը, որով և սկսեց պարապել պաշտօնից ազատ ժամերին:

Ո՛րքան մի բան լաւ չէր. գործը պահանջում էր, որ Սահառունին մի տեղ չը մնայ նստած, այլ ճանապարհորդի, այնպէս որ նա շատ յաճախ ստիպւած էր լինում մենակ թողնել կնոջը:

Կատարինէն մտաւ իւր սանամօր իշխանուհի Ռիկօձէի թեի տակ, որ տիկին Աբգարեանի մօտ բարեկամն էր: Նա անզաւակ լինելով սէրը գցեց Կատարինէի վերայ, Կատարինէն էլ նորան սիրեց: Իշխանուհին չափից դուրս բարի սիրտ ունէր, բայց մի քիչ թեթեւամիտ էր: Արձակ կեանք վարելով՝ իշխանուհին գնացող-եկող շատ ունէր, ինքն էլ տանը քիչ էր նստում. ամեն օր կամ հիւրեր էր ունենում կամ ինքն էր հիւր գնում կամ թէ թատրօն, երեկոյթ, զբօսնելու էր գնում: Իւր սանիկին նա մասնակից էր անում բոլոր իւր զւարճութիւններին, հետը տանում էր ամեն տեղ:

— Կատեա, դու որ գալիս ես՝ տունս կենդանութիւն է ստանում. քեզ պէս սիրուն ու գրաւիչ կին քաղաքումը քիչ կը գտնուի: Հիմա քո այն ժամանակն է, որ միշտ պէտք է քէֆ անես, ուրախանաս: Շուտով բոլոր երեկոյթների ու պարահանդէսների թագուհին կը դառնաս, — լսում էր անդադար նորահարսը և քիչ-քիչ սկսում էր ենթարկւել այդ գովասանական խօսքերի ազդեցութեան: Երբ որ մարդը վերադառնում էր քաղաք, նա փաթաթւում էր վզին և սկսում էր յափշտակութեամբ պատմել իւր վայելած զւարճութիւնների մասին:

— Գէորգ, ի՛նչ սանամայրը հրաշալի, պաշտելի կին է, յաճախ ասում էր նա մորդուն:

Սահառունին սկզբում ուրախ էր, որ իշխանուհի Ռիկօձէն չէ թողնում, որ իւր բացակայութեան ժամանակ Կատարինէն տխրի, ձանձրանայ, բայց երբ նկատեց, որ նա շատ է գրավւում զւարճու-

թիւներով, սկսեց ամեն միջոց գործ դնել, որ դատարկ, անխորհուրդ կեանք չը վարի: Նա աշխատում էր հետաքրքրեցնել կնոջը լուրջ խնդիրներով, ընտրում էր նորա կարգալու համար ժողովրդականացրած գրեթէ քնքեր, երեկոցեանները կամ հետը նորան թատրոն էր տանում կամ թէ հրաւիրում էր իւր տունը իւր ամենաուրախ ընկերներին, մի խօսքով՝ երեւում էր, որ նա ամեն ջանք գործ էր դնում, տանու կեանքը կնոջ համար դուրեկան դարձնելու: Քանի որ մարդը հետն էր լինում Կատարինէն բոլորովին գոհ էր լինում այդ տեսակ կեանքից, բայց հենց որ մարդը քաղաքից հեռանում էր նա էլի ընկնում էր զւարճութիւնների յետեւից:

Կնոջ վարած կեանքը այնպիսի ծախսերի տակ էր գցում Սահառունուն, որ նորա կարողութիւնից վեր էր: Սահառունին սլարաք անել չէր սիրում, բայց ստիպւած էր պարաք առնել կնոջ պահանջները կատարելու համար, յոյս ունենալով շուտով վճարելու իւր ապագայ պաշտօնից ստանալիք ռոճիկից, իսկ երբ որ շաքարի գործարանը գլուխ չ'եկաւ, նա սաստիկ մտահոգութեան մէջ ընկաւ և սկսեց իրան աւելի յարմար ու ձեռնտու զարծ փնտրել: 'Իրամատէրը նկատելով այդ և չ'ուզենալով զրկւել Սահառունու պէս աշխատաւոր, ընդունակ և բարեխիղճ օգնականից խնդրեց որ դուրս չ'ը գայ իւր մօտից, իւր բոլոր գործերի հաւատարմատար շինեց նորան և ռոճիկը առաջւանից երկու անգամ աւելցրեց: Սահառունին ստիպւած էր ընդունելու նորա առաջարկութիւնը, որովհետև ուրիշ գործ գտնելու յոյս չ'ը կար: Ստանձնելով իւր նոր պաշտօնը նա ուզէր չ'ուզէր պէտք է երևան հանէր առաջւայ կառավարիչների անբարեխիղճ գործավարութիւնը, որոնք զանազան միջոցներով կտրելիս էին եղել բանւորների փողերը իրանց գրպանը լցնելու համար: Սահառունու ցանկութիւնն էր միայն բարեխիղճութեամբ վերաբերւել իւր պաշտօնին, բայց նա իւր բարեխիղճութեամբ թշնամիներ վաստակեց:

— Եհ, 'Իէորդ, ես չէի ասում, որ քո այդ նորամուծութիւնների շնորհիւ՝ վատամարդի կը լինես ու շատերին կը զրգռես քո դէմ, ասաց նորան մի օր փողոցում նորա ընկերներից մէկը՝ Ասունին:

Ասունին ուսնու մարդու պէս էր ընդունւած Սահառունիների մօտ: Նա ուսանողական չորս տարւայ կեանքի ընթացքում Սահառունու հետ ապրելով բարոյապէս ենթարկւել էր նորա ազդեցու-

Թեանը և այժմ էլ այդ ազդեցութեան տակ էր, թէև ինքը այդ էջը նկատում: Նորա ամենաբնորոշ յատկութիւնը նորա անշահասէր կամակատարութիւնն էր ու անհոգ ուրախութիւնը: Նա սիրում էր նոր նոր տպաւորութիւններ, իսկ այնքան դրական խելք չունէր, որ այդ տպաւորութիւնները խոր հետք թողնէին մէջը:

Աւարտելով ուսումը համալսարանի իրաւաբանական բաժնում, նա իբրև Կովկասեան Թոշակաւոր իսկոյն տեղ ստացաւ դատաստանական մասում Կովկասի մի նահանգում, որտեղից մի տարի անցած նորան փոխադրեցին Ք-ս:

— Ճիշտ, Գէորգ, դարդ չունէիր, գլխիդ դարդ շինեցիր, կարեկցաբար կրկնեց Ասունին փոքր ինչ լսելուց յետոյ:

— Այդպիսի բաներից, Աղեքսանդր, ես չեմ վախենում, դու ասա գործը լաջող գնայ:

Անցաւ մի ամիս, երկու ամիս, Սահառունին տեսաւ, որ գործը առաջ չի գնում, իսկ ինքը օր օրի վերայ աւելի ու աւելի թշնամիներ է վաստակում իւր պաշտօնակիցների միջից:

Սահառունին օրէց օր աւելի ու աւելի հաստատ էր համոզւում, որ չարիքը շատ խոր արմատ է գցել, որ ծառայողների անբարեխնթութիւնը այնքան սովորական բան է դարձել, որ էլ անագնւում թիւն չի համարւում:

Այդ անհամութիւնները այնքան զգեցրել էին Սահառունուն, որ նա վճռեց ընդ միշտ թողնել իւր պաշտօնը: Յարմար առիթ էլ կար. — երկու դրամատէր շատ ձեռնտու պայմաններով կապալով էին վերցրել Ք-սին մերձակայ մի կալած և քանի ժամանակ է առաջարկում էին Սահառունուն ընկերանալ իրանց հետ:

Սահառունին, նոցա հետ պայման կապելուց յետոյ, այնպիսի թեթեւութիւն զգաց, կարծես շալակիցը մի ահագին սար վայր ընկաւ:

Տուն վերադառնալով, նա կնոջը խորհուրդ տուեց առ ժամանակ տանու ծախսերը կրճատել: Շատ քաղաքավարի կերպով բացատրեց նորան իւր միտքը Սահառունին, բայց էլ ի տհաճութեամբ լսեց կինը նորա ասածը:

Ամուսինների կեանքի այդ տագնապի ժամանակն էր, որ Ամիրանօֆն ու Հեղինէն պատկեցին: Կատարինէն սրտով ուրախ էր այդ

բանին: Նա առժամանակ ամեն բան մոռացութեան տուեց և դրա-
ւուեց իւր վազուցւայ ընկերուհու բարեկամութեամբ: Սահառունուն
մեծ ուրախութիւն էր պատճառում նոցա բարեկամութիւնը և նա
մեծ յոյսեր էր դնում կնոջ լուրջ, համեստ ու սակաւապահանջ ընկե-
րուհու բարերար ազդեցութեան վերայ: Բայց մի քանի ամսից յետոյ
Վատարինէն սկսեց սառել դէպի Հեղինէն. նա էլ առաջւայ նման
ուրախ չէր զգում իրար Հեղինէի հետ եղած ժամանակ և երբեմն —
երբեմն մինչև անգամ կարծես նորան նեղութիւն էր պատճառում
ընկերուհու ներկայութիւնը:

VIII.

Որոշւած երեկոներէից մի երեկոյ Նիզաւետա Բօգդանովնա Միհ-
րանօվան քաղցր սրտայուզութեան մէջ քայլում էր՝ երեկոյթի հա-
մար սարքած, պատրաստւած՝ դահլիճներում:

Նորա մարդը բարձր պաշտօն ստանալով Սահառունուց երկու
ամիս առաջ էր Ն.-ից թ-ս տեղափոխուել:

Միհրանօվան այն տեսակ կանանցից էր, որոնք ոչ մի միջոցից
չեն խորշում իրանց ամուսինների համար բարձր շրջաններում աչքի
ընկնող դիրք ձեռք բերելու համար: Մի կողմից՝ պատրաստ լինելով
ամեն տեսակ ծառայութիւն մատուցանելու մեծերին, միւս կողմից՝
նա իւր մարդու ստորագրեալների գլուխը տանում էր հազար ու
մի խնդիրքներով ու յանձնարարութիւններով, բայց ի հարկէ նա
այդ այնպիսի վայելուչ ձևով էր անում, որ շատ չէր ծակում կողմ-
նակի մարդկանց աչքը: Ճարպիկ և խորամանկ բնաւորութեան աչք
լինելով՝ նա անգամ էր գրում և ընտրում բոլոր բարեգործական
յանձնաժողովներում, բայց անվարձ լաւութիւն անելու սովորութիւն
չունենալով, նա իւր կօպէկանոց աշխատանքի համար տասնապատիկ
վարձատրութիւն էր ուզում ստանալ:

Միհրանօվան գնում գալիս էր ու շուտ-շուտ կանգ առնում սե-
ղանի առաջ, բաց էր անում գեղեցկաշէն, արկղիկը և հաշուում թէ
որքան տոմսակ ունի ծախելու բարեգործական նպատակով տրուող
նւազահանդէսի համար: Ամիրանօվը երևի մի քսան տոմսակ կը
վերցնի, Վատարինէ Սահառունին տասը, իշխանուհի Նալոնին
երեսուն, յետոյ մտքումը էլի շատերին հաշուելով վճռեց, որ կը

մեայ մօտ հարիւր տոմսակ: Ե՛հ, ոչինչ, այդ էլ դժւար չի լինի ծախել, մոածեց նա. անցեալ երեքշաբթի թէև հաստատ չը գիտէի, բայց բոլորին ասացի, որ այս անգամ իմ մօտ կը լինի և կը երգի գեղեցկուհի պրիմադօննան. այդ լաւ հրապոյր է ջահէնների համար, շատերը կը գան... իսկ կոմսուհին ո՛րքան կ'ուրախանայ, ոչ մի բան նորան այնքան զւարճութիւն չի պատճառում, որքան յաջող սարքած նւագահանդէսը, յաղթական եղանակով համարեալսելի ձայնով արտասանեց նա և սկսեց մոածել ընթրիքի մասին: Ընգամենը երեսուն հոգու համար է պատուէր տւած, իսկ կարելի է լիսուն հոգի գան. պէտք կը լինի աւելի շատ պատրաստել... բայց ոչինչ, որ շատ լինին թղթախաղից մօտ երեսուն թուրքի կը հաւաքուի, մխիթարում էր ինքն իրան Միհրանովան: Պէտք է այնպէս կարգադրել, որ գոնէ տասը սեղանի վերայ խաղան... Պէտք է հոգա տանել բարեգործական ներկայացման համար... Աղջիկներս, մանաւանդ Նազեան, շատ գեղեցիկ կը լինին իրանց դերերում, վաղը պէտք է խօսել Կոմսուհու հետ այդ ներկայացման մասին...

Մէկ մէկի յետևից եկող հիւրերը ընդհատեցին Ելիզաւետա Բօգդանօվնայի մտախոհութիւնը:

—Ախ, սիրելիս, չեմ կարող ասել թէ որքան ուրախ եմ ձեզ տեսնելով, չափազանց սերալիւր կերպով ընդունեց նա Կատարինէ Սահառունուն, որ ներս մտաւ Ասունուհետ ձեռին բռնած մի ծրար:

—Այդ ի՞նչ էք բերել, սիրելիս:

—Խոստացածս եմ բերել վիճակախաղի համար:

Ելիզաւետա Բօգդանօվնայի աչքերը ուրախութիւնից փայլեցին:

—Ո՛րքան բարի էք գուք, ասաց նա շողոքորթութեամբ և համբուրեց Կատարինէին: Բայց ինչու էք այսքան թանկագին բաներ բերել, աւելի հասարակ բաներն էլ ձեռք կը տային:

—Ոչինչ, այդպիսի մանր-մոնր բաներ շատ ունեմ:

—Ե՛հ, ինչ էիք նեղութիւն կրում:

Նա Կատարինէի բերած իրեղէնները դնելու յարմար տեղ էր փնտրում, որ բոլորն էլ տեսնէին ու օրինակ առնէին նորանից. իսկ Ասունին ու Կատարինէն այդ ժամանակ կամաց խօսում էին:

—Մինչև այժմ մարդու գլուխ էր տանում, իսկ այժմ ասում

է, թէ ինչու էիք նեղութիւն կրում: Ս'Ֆ, Աստուած փրկի, ազատի այդպիսի բռնաներից:

— Կամա՛ց, կը լսի, Ալեքսանդր Վասիլի: Ինչ արած ամեն մարդ մի պակասութիւն կ'ունենայ, առանց դորան չի լինի:

— Բայց դորա պակասութիւնները անհաշիւ են: Ա՛յ, շուտով Պրիմադօննայի բննֆիսն է լինելու, տեսէք թէ ինչպէս է փողեր պոկելու մեղանից: Ինչ արած. հօ չի կարելի որ աղջիկների վարժուհու բննֆիսին իրանց ընտանիքի կողմից ընծայ չը տայ:

— Զէ, չէ, այդպիսի բան չի անի, դուք զրպարտում էք նորան, ուշքը ցրւած պատասխանեց Կատարինէն և նայեց նոր եկող հիւրերին ու շատ ուրախացաւ տեսնելով նրանց մէջ երիտասարդ և գեղեցիկ Տրունցեկուն:

Տրունցեկին, շքեղազգեստ, մի ձեռին գլխարկը բռնած, միւս ձեռքում կոտորւելով պտտացնում էր մենակնոցը, լօրենտը և ինքնալստահ, յանդուգն հայեացքով նայում բոլորովին ոտից մինչև գլուխ:

Միհրանօվայի աղջիկները, Նադեան և Սօֆիան, տեսնելով ցանկալի հիւրին, քչփշացին կողքներին կանգնած օրիորդներին՝ տեսա՛ք, որ ասում էինք թէ այսօր Տրունցեկին կը լինի մեղ մօտ, և ուրախուրախ դիմաւորեցին նորան:

Մեծ քոյրը Նադեան սիրուն, կարմրայտ, սևահեր և գեղեցկակազմ օրիորդ էր. ծնողներն ու ծանօթները յափշտակւած նորա գեղեցկութեամբ երեխայ ժամանակից նորան երես էին տւել. նորա դէմքը հպարտութիւն, գոռոզութիւն էր արտայայտում: Սօֆիան մի տարով էր նորանից փոքր. նա ոչնչով աչքի չէր ընկնում, թէև դիմազօծերը կանոնաւոր էին, բայց շատ լղար ու բութիկ էր: Նրկուն էլ կրթւել էին Թ. սի ամենալաւ համարւող պանսիօններից մէկում, ուր բացի վայելուչ ձևերից ու ֆրանսերէնից էլ ուրիշ համարեա ոչնչի վրայ ուշք չէին դարձնում:

Անուշադիթ թողնելով միւս բոլոր հիւրերին օրիորդ Միհրանօվաները բաց էին արել իրանց հաճոյախօսութիւնների տոպրակը Տրունցեկու համար: Նա, ըստ երևոյթին, շատ էլ ուշք չէր դարձնում նոցա խօսքերին և աչքերով ում-որ փնտրում էր:

Վերջապէս գտաւ, մտածեց նա և սլացաւ դէպի Կատարինէն:

—Թող տւէք, Կատարինա Իւանովնա, հրաւիրել ձեզ կադրիլի և մազուրկայի:

—Ուրախութեամբ, համաձայնեց նա ժպտափայլ դէմքով:

Միհրանովայի աղջիկների դիւին կարծես սառւր ջուր ածեցին. նոքա անյայտացան:

—Ուրախութեանս չափ չը կայ, որ ինձ արմանացրիք այդ պատւին: Ո՞ր ատողիցն էր այս բախտը, սկսեց հաճոյախօսել Տրուհիցկին:

Կատարինէն կոտորուելով գլուխը յետ գցեց ու ինքնագոհ կերպով ծիծաղեց. այտերը փոս ընկան և երևացին սպիտակ, գեղեցիկ ատամները: Այդ րոպէին նա հիանալի էր: Տրուհիցկին աչքը չէր հեռացնում նորա երեսից: Կատարինէն զգում էր, որ ինքը նորան դուր է գալիս:

—Ոչ մի տեղ չէք երևում, Ադուֆ Անդրէիչ, ասաց նա փոքր ինչ լռութիւնից յետոյ:

—Եթէ ամեն տեղ հանդիպէի այնպիսի սքանելի էակների... խօսքը բերնումն էր, որ Կատարինէին մօտեցաւ Հեղինէ Ամիրանեանը և քաջ տւեց տարաւ հետը:

Միհրանովաները և մի քանի ուրիշ օրիորդներ ծանկեցին Տրուհիցկուն:

Դահլիճը լցւում էր հիւրերով. տանտիկինը ամեն մէկին դիմաւորում էր աւելի կամ պակաս սիրալիր կերպով նայելով թէ ով և ինչ աստիճանի տէր էր:

—Ցրեցի՞ք տոմսակները, Թօմա, և դիմեց նա մի փոքրահասակ, թիկնաւէտ, բայց գեղիցիկ երիտասարդի: Նա նոր էր աւարտել ուսումը Պետերբուրգի համալսարանի ֆիզիկա-մաթեմատիկական բաժնում կանդիտատի աստիճանով:

Թօմաեւը բարեսիրտ և ընդունակ ուղայ էր, բայց շարժաճքների կոպտութեան, անհոգ հագնաճքի և կծու, խիստ խօսակցութեան շնորհիւ կողմնակի մարդկանց դուր չէր գալիս: Թօմաեւը այդ հասկանում էր, բայց սկի հոգը չէր. նա ոչ ոքի աչքը մոնել չէր աշխատում, ամենքի երեսին շիտակ խօսում էր և առհասարակ չէր սիրում իրան ազատութիւնը ճնշել այս կամ այն նկատումներով:

—Դժբախտաբար, ո՞չ, Ելիզաւետա Բօգդանովնա, անհոգ կերպով պատասխանեց Թօմաեւը, վերադարձնելով նորան տոմսակները:

ես ձեզ առաջուց ասացի, որ այսպիսի բաներում ես շատ անշնորհք եմ:

—Այ քեզ բա՛ն, մի հատ էլ է չի ծախել, տհաճութեամբ բացականչեց Միհրանովան առմանները հաշվելուց յետոյ և շարացած նայեց Թովմեին:

Միհրանովան նորա վրայ նայում էր իբրև իւր պարտապանի վրայ, որովհետև բացի այն որ նա իւր տանը շարաթը չորս անգամ դաս էր տալիս, երկու-երեք ուրիշ ընտանիքներում իւր շնորհիւ դասեր էր գտել:

Յոյս ունեմ, որ դուք աւելի ուրախ լուր բերած կը լինէք, դիմեց նա Ասուհուն, որ մօտենում էր իրան:

Ասուհին գրպանից հանեց շքեղ դրամատուփը և աւեց Միհրանովային տոմսակների փողը:

—Ի՞նչ հիանալի դրամատուփ է, մեր վիճակախաղի զարդերից մէկը կարող էր լինել:

—Թող տւէք առաջարկել ձեզ...

—Ձէ՛, չէ՛, ես կատակով էի ասում, ինչու զրկւէք...

—Ինչ էք ասում, արժի՞ խօսել այսպիսի շնչին բանի մասին:

—Տւէք, ես ուզում եմ միայն ցոյց տալ մի քանի տիկիներին:

Միհրանովան առաւ դրամատուփը և դուրս եկաւ դահլիճից:

—Բարեկա՛մ, էլ ծործորակդ կը տեսնես ու դրամատուփդ չես տեսնի, ծիծաղելով ասաց Թովմեւը ու խփեց ընկերոջ ուսին:

Այդ ժամանակ ածեցին կադրիլի ըրտուրները:

—Դրամատուփս փայ տէր, կանչելով գնաց, գնամ գոնէ սիրուն օրիորդների հետ պարելով մխիթարւեմ, ասաց Ասուհին ու մօտեցաւ Կատարինէին ու Հեղինէին, որոնք տաք-տաք խօսում էին:

—Կարելի՞ է ձեզ հրաւիրել, Կատերինա Իւանովնա:

—Ես պարում եմ Տրուենիցկու հետ, առանձնապէս շեշտելով արտասանեց Կատարինէն:

—Իսկ ձե՞զ, տիկին Հեղինէ:

—Ուրախութեամբ, մանաւանդ որ այսօր սիրտս շատ է ուզում պարել:

—Ազօր՛Ք Անդրէիչ, վիզ-ա-վի չը փնտրէք, արդէն կայ:

—Շատ ուրախ եմ, ասաց Տրուենիցկին գլուխ տալով Հեղինէին: Մի բանն է վատ, ելիզա Պաւլովնա:

—Ի՞նչը:

—Les vis-à-vis sont des amis, իսկ դուք երբեք բարեհաճ չէք եղել դէպի ինձ: Հեղինէն անտարբերութեամբ լսեց նորա ասածը և իսկոյն խօսակցութիւնը փոխեց ուրիշ նիւթի վերայ:

—Զէք կարող երևակայել, Ալեքսանդր Վասիլիչ, թէ որքան լաւ է պարուժ մրունիցկին. նորա հետ պարելիս մարդու ոտները կարծես գետնին չեն կպչում, ոգևորութեամբ ասաց Վատարինէն Ասունուն: Նա այսօր ամենից դեղեցիկն է, չէ՞:

—Ամեն բանում նա միշտ առաջինն է, հաստատեցին նորա խօսքը կողքին կանգնած օրիորդները:

—Հեղիկ, ինչո՞ւ ես դու այդպէս սառը վարում մրունիցկու հետ, հարցրեց Վատարինէն:

—Ինչու պիտի. նա սկի դուրս չի գալիս:

—Վա՛. ա՛յ թէ ասացիր, հա. ասա տեսնենք նորանից լաւ ո՞վ կայ այստեղ: Ծի՞շտ է, ասում են որ նա քո փեսացուն է եղել:

—Այսինքն ուղեւ է լինել, բայց չի յաջողել: Աստուած սիրես, ոչ ոքի չասես, ես չեմ սիրում պարծենալ եղած փեսացուներով: Գէօրգի Լեքսանդրովիչը այսօր կը վերադառնայ:

—Խա՛չը, չը գիտեմ. ով է իմանում, կարելի է գայ:

Վատարինէի անտարբեր պատասխանը Հեղինէին շատ զարմացրեց:

—Մի ժամանակ ժամերն էր հաշւում թէ երբ պէտք է վերադառնայ մարդը, իսկ այժմ կարծես նորա համար մէկ է թէ մարդը քաղաքումն է թէ չէ, մտածեց նա:

—Մինչև հիմա դեռ չի եկել ձեր մարդը, խեղճ աղջիկ, հարեանց ի կերպով ասաց տանտիկինը:

—Նա այնքան շուտ-շուտ է ինձ մենակ թողնում, որ քիչ քիչ սովորում եմ:

—Ինչի՞ն էք սովորում, հարցրեց մրունիցկին, որ այդ ժամանակ մօտեցել էր նորան:

—Մարդու բացակայութեանը, նորա տեղ պատասխանեց Միհրանովայի մեծ աղջիկը և այնպէս գոհ մնաց ինքն իրանից, կարծես մի քաջութիւն արեց, որ այդ ասաց: Ասում են այժմ այդ մօղա է, աւելացրեց նա ուղեւով սրախօսութիւն անել:

Տրուներցկին թեթեւ ժպտաց և հրաւիրեց Կատարինէին մի պտոյտ վալսի:

— Ո՞վ է ձեզ ասել, որ այդ մօդա է, ձեր լեկցիաներումը կամ ինչպէս ասում են՝ բարձրագոյն կուրսերումն էք այդ սովորել, հեգնօրէն ասաց օրիորդին Ստունին:

— Ձեզ հետ չե՛ն խօսում, խիստ կերպով պատասխանեց Նահեան և հեռացաւ: Ստունին վազեց նորա յետևից:

— Մի պտոյտի տեղ երեքն արեցինք, ասաց Կատարինէն կարմրատակած ու ընկաւ առաջին պատահած աթոռի վերայ:

— Ձեզ հետ պարելիս մարդ չի նկատում թէ քանի պտոյտ է արել, դուք շատ թեթեւ էք պարում:

— ձի՞շտ: Այստեղ շատ շոք է, Ագօլֆ Անդրէիչ, գնանք միւս սենեակը: Նոքա թեթեւի անցրած զուրս եկան դահլիճից, գնացին հիւրասենեակը և բազմեցին վառարանի դէմ ու դէմ:

— Եկատերինա Իւանսփնա, հոգիս, մի բան ածէք դաշնամուրի վերայ, ընդհատեց նսցա քաղցր tête à tête-ը տանտիկինը: Կատարինէն բացասաբար շարժեց գլուխը:

— Խնդրեմ, սիրելիս, մի մերժիր. բոլորը անհամբերութեամբ սպասում են ձեզ:

Կատարինէն նայեց Տրուներցկուն, կարծես սպասում էր, որ նա խնդրի, և վերջապէս համաձայնեց:

Սկզբում կարծես մատները չէին հնազանդում նորա կամքին, բայց քիչ քիչ նա ոգևորւեց և գահլիճը լցւեց Շօպէնի վալսի հրաշալի գեղգեղանքով:

— Դուք էլ կ'երգէք, չէ՞, Ագօլֆ Անդրէիչ, զիմեց նորան Միհրանովան երբ որ Կատարինէն վերջացրեց վալսը:

Տրուներցկին երկար ժամանակ նազ էր անում, կոտրուում էր, զանազան պատճառներ էր բերում, որ իբր թէ չի կարող երգել, բայց տանտիկինը այնքան խնդրեց, որ նա վերջ ի վերջոյ ստիպւած սկսեց երգել և ներկայացրեց մի քանի տեսարաններ ուսու ժողովրդի կենանքից: Նա այնպէս լաւ ներկայացրեց, որ բոլորը մնացին հիացած:

Նւագածուծութիւնը վերջանալուց յետոյ, քիչ-քիչ Կատարինէի շուրջը պատեցին համարեա բոլոր հիւրերը. գովասանքներ էր, որ ամեն կողմից թափում էին գլխին: Ո՛ւ միայն ջահէլները, հասակն

առաժներն էլ կողքիցը չէին հեռանում և աշխատում էին մի կերպ հաճոյանալ նորան։

Մարդ զարմանում էր Կատարինէի ընդունակութեան վերայ. հէնց որ մի հասարակութեան մէջ էր ընկնում, մէկ էլ տեսնես արդէն հասարակութեան ծագիկն է դարձել, և որ գլխաւորն է միւս կանանց մէջ նախանձ չէր գրգռում։

Օրիորդ Միհրանօվաները Կատարինէի կողքը բռնել էին ու չէին հեռանում, որ իրանք էլ նորա ջրերն ընկնեն, նորա շնորհիւ միշտ կաւալերների հետ լինեն։

Կատարինէն խկապէս ասած գեղեցկուհի չէր։

Ուրիշ նշանաւոր բան չուներ. միջին հասակ, համալափ կազմւածք, կլոր, թարմ երես, շագանակագոյն մազեր, վառվռուն մուգ աւքեր, ծայրը մի քիչ վեր բարձրացած քիթ, — ահա նորա կերպարանքը։ Բայց միշտ սազով հագնւելու վարպետութիւնը, շարժունքների բնածին նազուկութիւնը, այտերի սիրուն փոսերը, վարդագոյն շրթունքներից վայր չ'եկող անկեղծ, ուրախ ժպիտը նորան վերին աստիճանի նազելի ու սքունչելի էակ էին դարձնում։

— Կատեա, կուգես քեզ ճանապարհ գցենք տուն, ասաց նորան Հեղինէ Ամիրանեանը տուն գնալիս։

— Ու, merci, ես դեռ կը մնամ։

— Ուրեմն մնաս բարեւ։ Զը գիտես ո՞րտեղ է Միքայէլը։

— Եթէ թոյլ կը տաք, ես այս բոլորէին կը գտնեմ նորան, ասաց Տրուհիցկին։

Ամիրանօվը կէս ժամ կը լինէր ինչ Միհրանօվայի հետ առանձնասենեակում նստած քիչում էր։

— Հանգիստ եգէք, ինձ վերայ յոյս դրէք, ելիզաւետա Բօգդանօվնա, բոլոր տոմսակները կը ծախւեն և ամեն բան ինչպէս հարկն է կը լինի, ասում էր նա այն ժամանակ երբ որ Տրուհիցկին մօտեցաւ նորան յայտնելու, որ կինը կանչում է տուն գնալ։

Ամիրանօվի գէմքը մթնեց, բայց նա իսկոյն փոխեց դէմքի արտայայտութիւնը։

— Երբ պէտք է դու սոխորես վերջապէս ազատ ասել խօսել հասարակութեան մէջ, մարդկանց հետ ինչպէս հարկն է վարւել, ասաց նա կնոջը ճանապարհին։

— Ձեմ հասկանում, Միշէլ, թէ ինչ ես ուզում ասել. ո՞ւմ հետ եմ ես վատ վարւել:

— Ասածս այն է, սիրելիս, որ դու մինչև այժմ չես կարողանում այնպէս խօսել, այնպէս վարւել, ինչպէս ընդունւած է լաւ շրջաններում: Այ, օրինակ առ Կատարինէից. տես ինչպէս է բոլորին գրաւում, իսկ քո վերայ մարդամէջի մարդու սիրտ չի էլ ուզում նայի, մի անկիւն կը մտնես ու լուռ—մունջ կը նստես: Ճիշտն ասած, ես չէի ուզի որ դու միշտ այդպէս մնաս:

— Լաւ կանէիր, Միշէլ, որ մի ուրիշ բանի վերայ ուշք դարձնէիր: Այս էլ քանի անգամ եղաւ, որ ես ասում եմ, թէ չեմ կարող բնութիւնս փոխել, ուր մնայ որ մի առանձին կարևորութիւն էլ չեմ տեսնում բնութիւնս փոխելու:

Մարդը անհամբերութեամբ ձեռքը թափ տւեց ու յօնքերը կիտեց:

— Ձը պէտք է մոռանաս, Հեղինէ, որ մենք ապրում ենք կարգին, կրթւած մարդկանց հասարակութեան մէջ, որոնք իրաւունք ունին մեզնից պահանջելու...

— Իմ կարծիքով, տաքացած ընդհատեց նորա խօսքը կինը, մեզնից իւրաքանչիւրը աւելի լուրջ պարտականութիւններ ունի հասարակութեան վերաբերմամբ, քան նորա ամեն մանր-մունր պահանջներին ստրկաբար հնազանդւելը և նորա բոլոր յիմար կարծիքներին գին դնելը: Երբեմն, ճիշտ է, մարդու սիրտն ուրախանում է, երբոր հաւաքւում խօսում են, բայց...

Այդ ռոպէին նոցա Փայէտօնի կողքով սլացաւ մի եռալուծ կառք, որ բոլորովին գրաւեց Հեղինէի ուշքը: Լուսնի պայծառ լուսով նա տեսաւ կառքում նստած տղամարդի դէմքը:

— Ախ, Սահառունին է, զարմացած ասաց Հեղինէն ու ձայն տւեց նորան, բայց նա արդէն հեռացել էր նոցանից:

Հեղինէն ուզում էր յետ դառնալ Միհրանօվենց մօտ ու տուն տանել Կատարինէին, բայց մարդն ասաց, որ այդ անյարմար է:

IX

Ամիրանօջների ամուսնական կեանքի առաջին տարին լրանալու վերայ էր։ Հեղինէն օր օրի վերայ աւելի սաստիկ էր զգում, որ մինչև այժմ անօգուտ է անցել իւր կեանքը և յաճախ ինքն իրան հարց էր տալիս թէ ինչի՞ համար է նա ապրում աշխարհիս երեսին, ի՞նչ է նորա կեանքի նպատակը։ Վերջապէս նա հասկացաւ որ իւր հոգու երգեմն մուլթ, անորոշ ձգտութիւնը այժմ պարզել, որոշ կերպարանք են ստացել և գործ են փնտրում, բայց միևնոյն ժամանակ նա զգում էր, որ իրան պակասում է գիտութեան պաշար և որոշ աշխարհահայեացք, Հեղինէին չէին կարող բաւարարութիւն տալ ոչ դաշնամուր ճնգճնգացնելը, ոչ ձեռագործով պարապելը, ոչ էլ աննպատակ ընթերցանութիւնը, մի խօսքով այն բոլորը, ինչով աշխատում են լցնել իրանց կեանքի դատարկութիւնը մեր կանանցից շատերը։ Նորա սիրտը ուրիշ բանի էր փափագում և ամեն անգամ, երբ նորա գլխում մի խելօք միտք էր ծագում, նա քիչ էր մնում որ ուրախութիւնից պար գայ, վազում էր մարդու մօտ և փաղաքշելով, գուրգուրելով խնդրում էր, որ լսի ինչ որ ինքը պատմելու է։ Իսկ նա այդպիսի դէպքերում, սառնութեամբ աչքերը գրելու թղթից հեռացնելով ու ծաղրական հայեացք զցնելով կնոջ վերայ, ասում էր «չը», ցնորամիտ, էլի երևի խելքդ մի բան է փչել։

Մի անգամ վերադառնալով մի երեկոյթից, ուր մարդը վաղ գործեր ունենալու պատճառով հետը չէր գնացել, Հեղինէն ուրախ ուրախ ներս մտաւ նորա առանձնասենեակը։

— Պատմիր տեսնենք, լաւ։ Ժամանակ անց կացրիր, շա՛տ պարեկար։

— Հա, Միշէլ, շատ ուրախ անցաւ ժամանակը։

Եւ ծանօթացայ մի մանկավարժի հետ։ Նա ուզում է ամսագիր հրատարակել և կին աշխատակից է փնտրում։

— Ելիդա Բօգգանօջան այնտե՞ղ էր, հօ՛ իմ մասին չը հարցրե՞ց, ընդհատեց նորա խօսքը մարդը։

— Մանկավարժը առանձնապէս ուշադրութիւն է դարձնում մանկական ծաղկոցների վերայ, ուզում է մեզնում տարածել ծագկոցներ։

Պատմելու ժամանակ Հեղինէի դէմքը գնալով աւելի ու աւելի ուշխոյժ էր ստանում:

— Ե՛հ, ի՛նչ անտանելին ես դարձել այսօր, քեզնից մարդավարի բան են հարցնում, իսկ դու ինչ-որ մանկական ծաղկոցների մասին ես խօսում, կոպտութեամբ ասաց Ամիրանովը: Գլուխս կը կորեմ, թէ դու ամբողջ երեկոն այդ պեղանտ մանկավարժի հետ նստած չը լինես:

— Թէկուզ հէնց նստեմ եմ, յետո՛յ, բարկացած պատասխանեց Հեղինէն:

— Ախր չի լինի, քանդուած ինստիտուտումն ես սովորել: Ե՛հ, երբ պէտք է վերջապէս խելքի գաս:

Ամիրանովը կնոջը գրկեց և մօտեցրեց իրան:

— Լսիր, թէ ինչ եմ ուզում անել, Միշէլ. ուղում եմ այժմ մանկավարժութեամբ պարապել. մանկավարժութիւնը վաղուց է ինձ հետաքրքրում: Երբ որ լաւ սովորեմ, պրծնեմ, կ'աշխատեմ սովորածիցս օգուտ քաղել:

— Բաւական է փիլիսոփայութիւն անենք. կէս գիշերից անց է, քնելու ժամանակ է, ծիծաղելով ասաց Ամիրանովը բռնելով կնոջ ձեռքը: Առաւօտը վեր կը կենանք, կը տեսնենք:

Հեղինէն յանդիմանօրէն նայեց մարդուն և լուռ ու մունջ գնաց նորա յետևից: Սա միշտ այսպէս բանը կատակի է գցում, իսկ ես շատ մեծ լոյս ունէի սորա աջակցութեան վերայ, մտածում էր Հեղինէն: Ի հարկէ նա նորա համար է այդպէս անում, որ ես աշխատելու, գործ կատարելու անպատրաստ եմ, բայց ինձ վերայ ծիծաղելու տեղ նա կարող էր ընդհակառակը օգնել խորհուրդներով: Այդպիսի մտածմունքներ խռովելով Հեղինէի միտքը, չէին թողնում, որ քնի:

Միւս օրը Ամիրանօյները ճաշի էին հրաւիրւած Շակունու մօտ:

— Ճի՞շտ է, Միխայիլ Պետրովիչ, որ քեռիդ 75,000 ռ. է տարել, հարցրեց Ամիրանովին ճաշի ժամանակ իշխանը:

— Կարծեմ ճիշտ է, շփոթւած պատասխանեց նա:

— Մարդ տանի, այդպէս տանի, հա՛. հը՞, Մայիկօ, ի՞նչ կասես:

— Միտո՛ս որ երկար ժամանակ չի վայելելու այդ փողերը, ասաց իշխանուհին խորհրդաւոր կերպով նայելով Ամիրանօյներին:

— Ելի մի ասաց. դու ո՞րանցից գիտես թէ ինչքան ժամանակ է վայելելու: Այս մեր կանայքը մի-մի մարգարէ են: Ով է իմանում,

Հեղիկ, դու էլ ես մարգարէ դարձել, հը՞, հարցրեց քեռին ուսին խփելով:

Հեղինէն ժպտաց ու մեղմ սեղմեց նորա ձեռքը:

— Իշխանուհին ճիշտ է ասում, որ քեռու առողջութիւնը խախտւո է, մտահոգ կերպով ասաց Ամիրանօվը:

Ճաշից յետոյ, Ամիրանօվների գնալուց առաջ իշխանուհին Հեղինէի ձեռքը բռնելով քաշեց մի կողմ ու սկսեց տաք-տաք հետը խօսել:

— Հօ քեռու մասին չէր հարց ու փորձ անում, հետաքրքրութեամբ հարցրեց Ամիրանօվը սանդուղքներից իջնելիս:

— Նա հետաքրքրւում էր, թէ դու ինչու ես խռովել քեռուդ հետ, խորհուրդ էր տալիս հաշտւել հետը, հաւատացնում էր որ նա շատ լաւ մարդ է թէև մի քիչ յամառ է ու վարւող բնաւորութիւն չ'ունի:

— Հը՛մ... ճիշտ է ասում, խորհրդաւոր կերպով տրտասանեց Ամիրանօվը Իսկ դու ի՞նչ ասացիր նորան:

— Ես ասացի, թէ իմ կարծիքով այժմեան հանգամանքներում հաշտւելը շատ օտարօտի, անյարմար բան կը լինի:

Մարդը խոր-խոր նայեց կնոջ վերայ: Նա վճռեց, որ քեռու հետ հաշտւելու համար կնոջ միջնորդութեան վերայ յոյս դնել չի լինի: Միայն քոյրերս կարող են այդ գլուխ բերել, մանաւանդ այլին. նա շատ վարպետ է այդպիսի բաներում, մտածում էր նա: Վատ չի լինի, եթէ Ելիզաւետա Բօգդանօվնային էլ մէջ գցեմ, նա էլ այդպիսի բաներում լաւ է:

Նոքա ամբողջ ճանապարհին իրար համարեա մի խօսք չ'ասացին: Կէս ժամի չափ առանձնասենեակում նստելուց յետոյ Ամիրանօվը, առանց կնոջը բան ասելու, գլխարկը վերցրեց որ գնաց:

— Ո՞ւր, Միշէլ:

— Քոյրերիս մօտ, վաղուց է մօտները չեմ եղել:

— Ինձ չե՞ս հասցնի Սահառունիների առևեր:

— Աչքիս վրայ, մանաւանդ որ ճանապարհը մէկ է:

Սահառունին տանը չէր. Կատարինէն նորա ընկերներից մի քանիսի հետ նստած հիւրասնեակում, ալբօմն էր նայում:

— Նայիր, Հեղիկ, ի՞նչ սիրուն է այս հագուստով, ասաց նա

ցոյց տալով Տրունիցկու պատկերը: Ձեռ կարող երևակայել, թէ ինչ հիանալի էր երէկ նա jeune premier-ի դերում: Ափսոս, Պետերբուրգ է գնում:

— Ո՛ւմ տանն էին երէկ ներկայացում տալիս, հարցրեց Քօմանսկը ծոյլ-ծոյլ տեղիցը վերկենալով:

— Իշխանուհի Ռիկոձէի տանը: Կուզէք, ձեզ հետ ծանօթացնեմ, շատ ուրախ տուն է:

— Ետ կը պարտաւորեցնէք, Եկատերինա Իվանովնա:

— Իմացած կաց, Դաւիթ, որ նորա մօտ պէտք է անպատճառ կոկած սօթած ու ֆրակով երթայ մարդ, ասաց Ասունին մատները քսելով Քօմանսկի գզգզած մազերին: Բայց ո՞ր է կորել Գէորգը, այսքան ժամանակ չը կայ, աւելցրեց նա գուրս նայելով լուսամուտից:

— Ճիշտ, մի քանի ժամանակ է նա շատ տխուր է երևում, ինչ է պատահել, հարցրեց Հեղինէն:

— Ինչ պէտք է լինի որ, գործերը լաւ չեն գնում, կարեկցարար պատասխանեց Ասունին: Սկզբում մեծ յոյս կար, որ սկսած գործը լաւ օգուտ կը տայ, իսկ այժմ բանից դուրս եկաւ, որ մեծ վնաս կ'ունենայ: Ընկերները սառույցին են քաշել նորան:

— Ով է մեղաւոր, խօսակցութեանը խառնեց Քօմանսկը: Գէորգի Ալեքսանդրովիչը կուրօրէն հաւատում էր իւր ընկերակիցներին. այժմ իւր դիւրահաւատութեան պատիժն է կրում: Լաւ է, թող այսուհետեւ մի քիչ զգոյշ լինի, թէ չէ ամեն մարդու հաւատում է և ամենքից խաբւում:

— Ինչ ես ասում, Դաւիթ: Ում մտքովը կ'անցնէր, որ այն երիտասարդները, որոնք համալսարանն աւարտելիս մեզ՝ առաջին լսարանի ուսանողներին՝ հիացնում էին իրանց վսեմ գաղափարներով, յանկարծ այդպիսի անպիտան մարդ դուրս կը գան: Ասա սորանից յետոյ էլ ոչ ոքի չը պէտք է հաւատանք էլի:

— Կարելի է հաւատալ, բայց պէտք է շատ զգոյշ լինել, առաջուց լաւ ճանաչել մարդուն: Զրպէտք է մոռանալ, որ կովկասցիները այժմ անցողական շրջանում են գտնւում, նահապետական դրութիւնից դուրս են գալիս, բայց դեռ բոլորովին չեն քաղաքակրթւել. իսկ այդպիսի վիճակում գտնւողները չեն կարողանում դիմադրել

կեանքի հրապոյրներին, փորձութիւններին, որոնք այդ ժամանակ աւելի շատանում, զօրանում են:

—Հեղինէն լուռ լսում էր ու ժամանակ առ ժամանակ պատուհանից դուրս նայում: Զանգը խփեցին. ներսմտան Սահառունին, Ամիրանօվնու Պետրոսեանը:

—Ներեցէք, տիկին Հեղինէ, որ ես երէկ խօսքս չը կատարեցի, ասաց Սահառունին նստելով նորա կողքին:

—Ինչո՞ւ այս անգամ խօսքներիդ տէր չեղաք, հարցրեց Հեղինէն ժպտալով:

—Ճիշտն ասած, չէի ուզում ոչ ոքի աչքին երևալ, տրամադրութիւնս էլ շտտ վատ էր, վախենում էի ուրիշների տրամադրութիւնն էլ խանգարեմ:

—Շատ զուր. հապա էլ ինչ ժամանակաւ հոմար են բարեկամները, որ մարդ վատ տրամադրութեան եղած ժամանակը չը դնայ մօտները, դարդը մոռանայ:

Սահառունին շնորհակալ սրտով նայեց Հեղինէին բայց դեռ բերանը չէր բաց արել խօսելու, որ Կատարինէն պաաառխանեց Հեղինէին:

—Զէ մի ի՞նչ. բաւական չէ, որ մարդ ինքը վատ տրամադրութեան է, գնայ ուրիշների մօտ, որ նոցա քէֆն էլ փչացնի:

—Գործերդ ի՞նչպէս են, Գէորգ, ուղղում են թէ էլի առաջաւայ նման են, սրտացաւութեամբ հարցրեց Ասունին:

—Կարծես ուզում են ուղղւել Տիգրանի ու Միքայէլի շնորհիւ: Այս շարաթ դու շատ չարարեցիր, չեմ իմանում ինչպէս պէտք է քո լաւութիւնիցդ դուրս գամ, դիմեց նա Պետրոսեանին և պինդ սեղմեց նորա ձեռքը: Վախենում եմ իմ պատճառով ուշացած լինես, ժամանակին չը հասնես քո գործին:

Բոլորը աչքները դարձրեցին Պետրոսեանի վերայ. խեղճը ամօթից չէր իմանում ինչ անի. վերջապէս կարծես տհաճութեամբ քթի տակին մրմրեացրեց:

—Էհ, ինչեր ես ասում... իմ արածս դատարկ բան է, ա՛յ Միխայէլ Պետրօվիչը...

—Նա, դորա ընկերներին «զորս դու պատւիրեցիր», մի լա՛ւ դրստեցի, ուռած—ուռած ասաց Ամիրանօվը առանց աչքը հեռացնելու «վաւկազ» լրագրի առաջին երեսից:

—Փառք Աստծու, որ ազատեցիր, շնորհաւորում եմ, ասաց Քօմաւը տեղիցը վերկենալով:

—Մինչև մի ուրիշ նոյնպիսի դէպք, հեգնօրէն արտասանեց Ամիրանովը:

Է, եղբայր քանի քանի անգամ ասել եմ քեզ, որ բացի ծառայութիւնից ուրիշ գործունէութիւն չը կայ, խրատի ձեռով աւելցրեց նա:

—Ճիշտ որ, արի դու ծառայութիւն մտիր, հաւատացնում եմ որ գոհ կը մնաս, համոզում էր Ասունին: Նայիրանցեալիդ. այս երեք տարւայ ընթացքում բացի դառնութիւններից ու թշնամիներից ի՞նչ ես վաստակել:

—Իմ մասին խնդրեմ էլ մի խօսիր, Ալեքսանդր, բարկացած դողարեցրեց նորա խօսքը Սահառունին: Մի անգամ ընդ միշտ խնդրում եմ, որ իմ մօտ ծառայութեան անուն չը տաս, ես ծառայութեան համար ոչ պատրաստուել եմ, ոչ էլ ընդունակութիւն ունեմ:

—Իսկ եթէ ապրուստի ուրիշ դուռ չը կա՞յ, տհաճութեամբ ասաց Կատարինէն: Սանամայրս, Ելիզաւետա Բօգդանօֆնան, իշխանուհի Նակունին, ամենքը զարմանում են թէ ինչու չես ուզում ծառայել. բոլորն էլ ասում են, որ ծառայութիւնից աւելի ձեռնտու ու պատուաւոր գործունէութիւն չը կայ:

Սահառունին հոգոց քաշեց ու ուզում էր պատասխանել, բայց յիշեց, որ ինքը շատ անգամ է կնոջը բացատրել իւր հայեացքը ծառայելու մասին, բայց նա չը կամենալով հասկանալ բանի էութիւնը, միշտ միևնոյնն է կրկնում, ու լռեց: Յիշեց Սահառունին, թէ ինչպէս շատ անգամ դրամական սուղ դրութեան մէջ գտնւելիս գժւարացել է նորան ասել, որ պէտք է ծախսերը քչացնել: Ինչեր չէր անում նա, ինչ զգուշութիւններ չէր բանացնում, որ կնոջ սիրտը չը կոտրի գորանով, բայց էլի չէր լինում, նա իսկոյն սկսում է լալ: Թէև Սահառունին սրտիցը պինդ էր, բայց կնոջ արտասուքներին չէր դիմանում: Կնոջը միանգամից չը զրգուելու համար, նա վճռեց քիչ-քիչ նորան սովորեցնել աւելի համեստ կեանք վարելու և այդ պատճառով չը նայելով իւր նիւթական սուղ դրութեանը քիչ էր պատահում, որ կնոջը զրկէր այս կամ այն թանկ արժող զւարճու-

թիւնից և բաւականանում էր միայն նորանով, որ աշխատում էր համոզել կնոջը:

Ոչ ոք խօսելու սիրտ չ'ունէր. բոլորն էլ լուռ ու մոռնջ ընկղմել էին մտածմունքների մէջ: Վերջապէս Ամիրանովը ընդհատեց լուռ-թիւնը, առաջարկելով կնոջը գնալ տուն:

— Ուր էք շտապում, ֆնացէք, միասին թէ՛ կը խմենք, խնդրում էր տանտէրը: Կատեա ջան, ինչու չեն բերում հեշտաեռը:

— Վայ, բոլորովին մոռացել էի: Ասաց ու օպերայից ինչ որ մի եղանակ զնգնացնելով դուրս եկաւ սենեակից:

— Ո՞ր օրն է լինելու, Տիգրան, հայոց օրիորդական դպրոցի օգտին տուող ներկայացումը, հարցրեց Ասունին:

— Հինգշաբթի: Ա՛յ, պարոններ, տոմսակները, վերցրէք ամեն մէկդ ձեր ծանօթների շրջանում ցրելու համար. դուք գիտէք, որ ես այդ բանում շատ անշնորհք եմ, ասաց Պետրոսեանը գրպանից մի ծրար տոմսակներ հանելով: Պէտք է աշխատել այս տարի մի քանի ներկայացումներ, նազահանդէսներ սարքել, որքան կարելի է շատ փող հաւաքել, թէ չէ ոչ միայն նոր ուսումնարան չենք կարող բանալ, այլ և ստիպած կը լինենք եղածներէից մի քանիսն էլ փակել, որովհետեւ շատ անօխիթար դրութեան մէջ են գտնոււմ, աւելացրեց նա աւելի ու աւելի ոգևորւելով:

Սահառունին ու Ասունին հաստատեցին նորա ասածը և մի քանի րոպէից յետոյ ընկերների մէջ տաք վիճաբանութիւն սկսեց հայոց ծխական ուսումնարանների դրութեան ու նշանակութեան մասին: Քօմաւը հերքում էր հայոց սեփական ծխական ուսումնարաններ ունենալու անհրաժեշտութիւնը. Սահառունին ոգևորւած ապացուցանում էր մայրենի լեզւի կարևորութիւնը տարրական կրթութեան համար. Պետրոսեանը յուզւած ժամանակ առ ժամանակ խառնւում էր խօսակցութեանը, մէկ երկու խօսք էր արում Քօմաւէի դէմ և կամ ինքն էր լսում ու սկսում մօրուքը անինչաց կերպով ձգձգել կամ խօսքը կտրում էին, չէին թողնում շարունակի. Ասունին էլ նոցա կողմն էր, իսկ Ամիրանովը «թէ պայտին էր խփում, թէ մեխին»:

— Լաւ, Գէորգ, իսկ թեմական դպրոցները ձեր կարծիքով ինչ նշանակութիւն ունեն:

—Շատ մեծ, Դաւիթ:

—Գիտեմ որ կարևոր նշանակութիւն էք տալիս. այդպէս որ չը լինէր, այնքան ժամանակ ու ջանք չէիք գործ դնիլ նոր կանոնադրութիւն կազմելու համար:

—Յեմական դպրոցները միակ ուսումնարաններն են, որոնցից կարող են արժանաւոր քահանաներու ժողովրդական ուսումնարանների համար հմուտ ուսուցիչներ դուրս գալ: Իսկ այժմ մեր ժողովուրդը ինչ աւելի մեծ կարօտութիւն ունի քան արժանաւոր քահանաների ու գիւղական ուսուցիչների: Նոքա պէտք է միջնորդի դեր կատարեն...

—Ում չէ յայտնի, տաքացած սկսեց խօսել Պետրոսեանը, որ ժողովրդի սկզբնական կրթութեան յաջողութիւնը անմիջապէս կսիւլած է գիւղական քահանաների ու ուսուցիչների պատրաստականութեան աստիճանից:

Թօմասեւը՝ ըստ երևոյթին՝ համոզեց ու շարունակում էր անհոգ կերպով նայել չորս կողմը պատած ծուխի քուլաներին:

—Պարոններ, ձեր վէճը մարդ կը քնացնի, յօրանջելով ասաց Կատարինէն: Աւելի լաւ կը լինի գնանք թէյ խմենք:

Իոյրը գնացին սեղանատուն:

—Երևի գլուխներդ տարանք մեր վէճով, հարցրեց Սահառունին նստելով Հեղինէի կողքին:

—Ինչ էք ասում. ընդհակառակը, դա ուզում է մանրամասնօրէն իմանալ, թէ ինչ բարեփոխութիւններ են կատարւում դպրանոցում, ասաց Կատարինէն ծիծաղելով:

—Ճիշտ:

Սահառունու ձայնի փոքր ինչ հեզնական եղանակը դիպաւ Հեղինէի սրտին:

Նա անթարթ նայեց նորա աչքերին. նորան թւաց, թէ Հեղինէի աչքերը վառւում են հարցասիրութեամբ, նոր բան լսելու փափագով և միևնոյն ժամանակ կարծես յանգիմանութիւն են արտայայտում:

—Ներեցէք, տիկին Հեղինէ, աղաչական ձայնով բացականչեց Սահառունին. ինձ համար այնքան սովորական է դարձել մեր կանոն անտարբերութիւնը դէպի հասարակական խնդիրները, որ ես

անգիտակցօրէն ձեր հարցասիրութեան անկեղծութեանն էլ կասկածով վերաբերեցի:

Նա աթոռ յօտեցրեց Հեղինէին և սկսեց պատմել:

—Թ...սում, ինչպէս ձեզ յայտնի է, մենք նիւթական կողմից ապահոված միայն մի ուսումնարան ունինք—թեմական դպրանոցը: Այդ ուսումնարանը թէ իւր ուղղութեամբ և թէ ծրագրի ու դասականութեան եղանակի կողմից շատ է յետ մնացել ժամանակի պահանջներից. նորան այդ անմխիթար վիճակից հանելու համար արմատական փոփոխութիւն է պէտք: Ահա այդ ի նկատի առնելով մենք աշխատում ենք, որ մասնաւոր եկեղեցական եկամուտները տրւեն ուսումնարանին և հոգեւորական հոգաբարձուների տեղ, որոնք ի չարն են գործ դնում իրանց իշխանութիւնը, ընտրւեն աշխարհական հոգաբարձուներ: Իսկ հոգեւորականութիւնը սաստիկ դէմ է մեր ձրգ-սումներին:

—Հասարակութիւնը, որքան ես նկատել եմ, մեծ յոյս ունի ձեզ վերայ:

—Սխալուում էք, տիկին Հեղինէ, այս բանում ես միայն ունիչ չեմ կարող անել. մենք ամենքս, ժողովրդից ընտրւած պատգամաւորներս, միասին պէտք է ամեն ջանք դործ դնենք այդ նպատակի իրագործման համար: Իսկ նոր ընտրւած հոգաբարձութիւնը կ'աշխատի շարունակել մեր սկսածը, ներքին բարենորոգութիւններ մտցնել դպրանոցում:

—Այդ բոլորը լաւ է, բայց տուն գնալու ժամանակ է, ասաց Ամիրանովը կնոջը:

—Ես մի քիչ էլ դեռ կը մնամ, Միշէլ. դուք ինձ տուն կը հասցնէ՞ք յետոյ, Գէօրգի Ալեքսանդրովիչ:

—Մեծ ուրախութեամբ:

Հեղինէն մարդուն մինչև սրահը ծանապարհ դրեց: Երբ որ նա վերադարձաւ, Ասունին աթոռ առաջարկեց, որ նստի և հարցրեց նորան հայերէն.

—Տիկին Հեղինէ, ինչո՞ւ դուք երբէք հայերէն չէք խօսում: Ձեր ուսուցիչն ասում է, որ դուք շատ լաւ դիտէք հայերէն:

—Ճիշտ է, ես բաւական լաւ հասկանում եմ, բայց ազատ խօսել չեմ կարողանում:

—Ախոսո՛ւ: Իսկ եթէ դուք հայերէն խօսէիք, գիտէք, որքան օրիորդներ ու տիկիկներ ձեր օրինակին կը հետևէին: Բայց կարծեմ Պետրոսեանը հաւատացած է, որ այդ լինելու բան չէ:

—Ե՞ս. այդ ես հաւատացած եմ... որովհետեւ կրթւած կուլող կանայք շատ արհամարհանքով են վերաբերում հայերէն լեզուին: Ես համոզւած եմ, որ նոքա աւելի շատ չինական լեզուով կը սկսեն պարապել քան իրանց մայրենի լեզուով, մաղձոտութեամբ արտասանեց Պետրոսեանը: Մի անասկ ցաւ է, էլի՛:

—Սխալուում ես, Տիգրան: ձիշտ է տասը տարի սրանից առաջ պղպէս էր, բայց այժմ մենք այդ ասելու իրաւունք չ'ունինք: Ես շատ օրիորդներ ու տիկիկներ եմ ճանաչում, որոնք սկսել են հայերէնով պարապել և մեծ յառաջադիմութիւն են անում. փոխանակ նոցա վերայ յարձակելու, պարոններ, աւելի լաւ կանէք եթէ խորհուրդներով օգնէք նոցա, հասկացնէք մայրենի լեզուի նշանակութիւնն ու անհրաժեշտութիւնը, և այն ժամանակ, հաւատացած կացէք, ձեր խօսքերը զուր չեն կորչի:

Ասունին ոգևորւած էր խօսում և նորա՝ սովորաբար ծաղր արտայայտող՝ աչքերը փայլում էին ոգևորութեան կրակով: Նա՝ բառիս բուն նշանակութեամբ՝ ազգասէր կուլել չէր կարող, բայց մի ամենաչնչին առիթ անգամ կարող էր նորա ազգասիրական զգացմունքը քորքոքել, որ՝ պէտք է ասել՝ շատ շուտ էլ սառչում էր. ընկերները ներողամտութեամբ էին վերաբերում Ասունու այդ րոպէական բորբոքումներին, որովհետեւ գիտէին, որ ինչ որ Ասունին ասում է, անկեղծ է ասում և ոչ թէ աչք շլացնելու համար: Այս անգամ էլ երբ որ Ասունին սկսեց պնդել, թէ այսուհետեւ իրանք պէտք է իրար հետ միշտ հայերէն խօսեն, բոլորն էլ ժպտացին, հաւաաացած լինելով, որ ինքը Ասունին ամենից առաջ կը քանդի այդ պայմանը:

Նոցա վիճելու ժամանակ Կատարինէն թէյի պատարաստութիւն էր տեսնում:

—Ինչ շոք է հեշտաեռի մօտ, ասաց նա տաքութիւնից կասկարմիր կտրած:

—Տուր ինձ, ևս թէյ չինեմ, իսկ դու դաշնամուր ածա: Թէյ կը խմենք, ասաց Թօմասեւը, որ երաժշտութեան սիրահար էր:

Կատարինէն գնաց դահլիճը. Սահառունին էլ գնաց այնտեղ,

բաց արեց դաշնամուրը և աթոռին կոթնած ուշադրութեամբ լսում էր:

— Քէֆա եկաւ, սիրելիս, տեսնելով թէ որքան մեծ յառաջադիմութիւն ես արել ածելում, ասաց նա կնոջը հիւրերի ցրելուց յետոյ:

— Այդ քեզ այդպէս է թւում քո թափառական կեանքից յետոյ:

— Ես էլ չեմ թափառի այսուհետեւ, հոգիս:

Սահառունին շատ անգամ ինքն իրան մեղադրում էր, որ կնոջը շարաթներով, երգեմն և ամիսներով մենակ է թողնում. շատ անգամ նորա դէմքը կնճուռում էր երբ որ յիշում էր, որ իւր երկու տարւայ ջերմեռանդ գործավարութեամբ ոչ ոքի ոչինչ օգուտ չի տւել, իսկ ինքը գուցէ ընդ միշտ զրկւել է բախտաւոր ընտանեկան կեանքից:

— Գուզէի՞ր, Կատեա, որ ես այնպիսի գործով պարապէի, որ կարողանայի աւելի ժամանակ նւիրել քեզ, քեզ հետ լինել, անսպասելի կերպով հարցրեց նա: Ինչո՞ւ ես լռել ու այդպէս տարօրինակ կերպով նայում ինձ վերայ: Ել ինձ չե՞ս սիրում:

Սահառունու զգացած ձայնը ներգործեց կնոջը և նա քնքշութեամբ բռնեց մարդու ձեռքը:

— Էհ, ինչ մտքեր են գալիս գլուխդ: Ի հարկէ սիրում եմ... Սանամօրս գնալուց յետոյ, Գէորգ, սիրտս մի քիչ տխրել է, բայց այդ ոչինչ, չէ՞ որ դու ուր որ գնաս ինձ էլ հետդ կը տանես, այնպէս չէ՞, ոգևորւելով հարցրեց Կատարինէն:

— Սահառունին չէր իմանում ինչ պատառխանի նորան և մըտքամուր վերկացաւ ու գնաց առանձնասենեակը:

Միւս օրը երբոր ժամի մէկից անց Սահառունին մտաւ կնոջ սենեակը, նա ծոյլ—ծոյլ ինչ որ ամսագիր էր թերթում:

— Օ՛Ֆ, Գէորգ, ձանձրութիւնը հոգիս մաշում է, չեմ իմանում ինչ անեմ օրը մի կերպ մթնացնելու համար, չե՞ս գայ այցելութիւններ անենք:

— Այսօր թատրօն ենք գնում, իսկ այցելութիւնները, հոգիս, կը յետաձգենք կիւրակէ օրւան:

Կինը ուռեց և այնպէս էր պատասխանում մարդու փաղաքշանքներին ու հարցերին կարծես բերնիցը վարձ էին ուղում:

Յանկարծ զանգահարութեան ձայն լսեց, և իսկոյն ներս թւան

օրիորդ Միհրանովաները՝ մի քիչ յետոյ էլ նոցա մայրը Ելիզաւետա Բօգդանօֆնան։ Կատարինէի ղէմքը իսկոյն պարզեց և նա աշխուժի եկաւ։ Սահառունին մնաց զարմացած տեսնելով, թէ ինչպէս կինը մի ակնթարթում կերպարանափոխեց. նա յօնքերը կիտեց և աննկատելի կերպով գահլիճից դուրս եկաւ։

— Ինչ լաւ երգիչների խումբ է այս տարի մեզնում, չէ՞, Կատեա, ասաց Սօֆիա Միհրանովան։

— № 20 օթեակը երկրորդ արօնեմենտին էլ քոնն է լինելու, չէ՞, հարցրեց Նադեան։

Կատարինէն տարակուսած, չէր իմանում ինչ պատասխանի։

— Ի հարկէ էլի պէտք է վերցնէք, ամենալաւ օպերաները երկրորդ արօնեմենտին են նշանակւած, համոզիչ եղանակով ասաց Ելիզաւետա Բօգդանօֆնան։

Կատարինէն շուտ-շուտ հրաւիրում էր օրիորդ Միհրանովաներին իւր օթեակը և այլպիսով ազատում էր Ելիզաւետա Բօգդանօֆնային առանձին օթեակ վերցնելու ծախսից. ահա թէ ինչու այդ հարցը հետաքրքրում էր նորան։

— Ինչ մարդավարութիւն է, Դէորգ, հիւրերին մենակ թողնել ու գնալ, տհաճութեամբ ասաց Կատարինէն մարդուն հիւրերի գնալուց յետոյ։

— Դու վաղուց գիտես, որ այդ ընտանիքը ինձ դուր չի գալիս։ Ես շատ ուրախ կը լինէի, եթէ մօտ յարաբերութիւններդ նոցա հետ կտրէիր։ Եթէ դու գոնէ մի փոքր յարգում ես ինձ, պէտք է խնդիրքս կատարես։

— Այ բեզ բան. Դու կարող ես չը սիրել նոցա, բայց իրաւունք չունես ինձնից պահանջելու, որ ես էլ անպատճառ քո պէս վերաբերւեմ նոցա։ Այդ համարեա միակ ուրախ ընտանիքն է հայերի մէջ և միակ տունն է, ուր հաւաքւում է օրինաւոր հասարակութիւն։

— Կատեա, հօ դիտես, որ իմ պահանջս կապրիզից չի առաջ պալիս. ես չեմ ուզում, որ քո պէս մաքուր, ազնիւ էակը իւր հեշտ յափշտակող բնաւորութեան շնորհիւ վարակւի այն կեղտից, որ...

— Օ՛հ, ձեռք քաշի, մարդու զգանքը զալիս է այդպիսի խօսքեր լսելիս, ընդհատեց նորա խօսքը կինը։ Այ, Ալեքսանդր Վասիլիշն եկաւ, հարցրու տես ով գնալ-գալ չ'ունի Միհրանովենց հետ։

—Յաճախել նոցա երեկոյթները ձեզ պէս սիրուն կանանց ընկերութիւնից հաճոյք ստանալու համար և բարեկամութիւն անել այդ ընտանիքի հետ—գրանք ջոկ բաներ են:

—Դուք էլ էք այդպէս ասում, հա՛:

Ասունու կատարներից Կատարինէն ուրախացաւ և խոստացաւ մարդու ցանկութիւնը կատարել:

Մի քանի օր անցած Սահառունին գործից տուն դառնալով Կատարինէին սուգ ու շիւանի մէջ տեսաւ:

—Ինչ ես լալիս, Կատեա, դու գիտես, որ աչքերիդ արտասուք տեսնելիս հոգիս քաղւում է, ասաց նա քնքշութեամբ բռնելով նորա ձեռքերը:

—Ինչ է, կարծում ես, քիչ բան է ինձ համար, որ չեմ կարողանում նորոգել օթեակի արօնեմենտը: Մեր բոլոր ծանօթները արդէն գրւել են: Ձեմ իմանում քեզ ինչ է պատահել, երէկ խնդրեցի մետաքսէ շոր առնես՝ չ'առար, այսօր օթեակին չեա թողնում գրւեմ, վողը ով է իմանում...:

Էլ չը կարողացաւ շարունակել, լացից կոկորդը բռնւեց, բայց մարդու վրայ յառած հայեացքը յանդիմանութեամբ լի էր:

—Միթէ՞, հոգիս, կարծում ես թէ դիտմամբ միայն քեզ վրչտացնելու համար եմ անում այդ: Դու պէտք է լաւ իմանաս, որ եթէ ձեռքիցս դար, չէի թողնի որ դու զրկւէիր թողնի որ դու զրկւէիր այդ անմեղ հաճոյքներից: Համբերութիւն ունեցիր, սիրադ ուրախ պահիր, որ ես էլ քեզ տեսնելով սիրտ առնեմ, կարողանամ առաջւայ եռանդով աշխատել: Արտասունքդ որ տեսնում եմ, Կատեա, էլ սիրտ չի մնում բան անելու:

Սահառունին սկսեց զգւել կնոջը: Նա զգացւեց և գրկելով մարդուն խոստացաւ էլ չիմարութիւններ չ'անել: Կատարինէն նոյնքան հեշտ ու շուտ էր մխիթարւում, որքան հեշտ յուսահատւում էր...

Որքան Սահառունին աշխատում էր, որ կինը տանը ուրախ լինի, չէր լինում. նա օրէցօր աւելի ձանձրանում ու տխրում էր, և միայն այն ժամանակն էր նորա երեսին ծիծաղ երևում, երբ որ մարդը առաջարկում էր մի տեղ զբօսանքի կամ հիւր գնալ: Մարդու բոլոր ջանքերը զարգացնելու կնոջ խելքը, ընդլայնելու նորա աշխարհահայեացքը, լուսամիտ հայեացքներ ներշնչելու նորան ի զուր

անցան: Սահառունին վերջապէս համոզւեց, որ ուղղւելու յոյս չը
կայ. դատարկութեան արմատը շատ խոր էր: Նա շատ էր լսել ինստի-
տուտի կրթութեան թերութիւնների մասին. այժմ նա իւր աչքով
տեսաւ, թէ ինչպէս ինստիտուտի վայրիվերոյ ուսումը զարգացնե-
լով օրիորդների մէջ փայլելու, աչք չլացնելու ցանկութիւնը, բոլո-
րովին մեղցնում է նոցանում կատարելագործւելու, զարգանալու
ձգտումը:

(Կը շարունակւի)